





舊五代史卷三十四

宋薛居正等撰

唐書第十

莊宗紀八

同光四年春正月戊午朔帝不受朝賀契丹寇渤海壬戌詔以去歲因被災珍物價騰踊自今月三日後避正殿減膳撤樂以答天譴應去年遭水災州縣秋夏稅賦並與放免自壬午年已前所欠殘稅及諸色課利已有勅命放免者尙聞所在卻有徵收宜令租庸司切準前勅處分應京畿內人戶有停貶斛斗者並令減價出糶如不遵行當令檢括西川王衍父子及偽署將相官吏除已行刑憲外一切釋放天下禁囚除十惡五逆官典犯賊屠牛毀錢放火劫舍持刀殺人者準律常赦不原外應合抵極刑者遞降一等



聖下舊作何保撰今改正

其餘罪犯悉與減降逃背軍健並放逐便癸亥河中節度使李繼麟來朝諸州上言準宣為去年十月地震集僧道起消災道場甲子魏王繼岌殺樞密使郭崇韜于西川且夷其族丙寅百官上表請復常膳凡三上表乃允之西川行營都監李延安進西川樂官二百九十八人契丹寇女真渤海戍寅契丹索巴堅遣使貢良馬庚辰帝異母弟鄜州節度使存義伏誅存義郭崇韜之子婿也故亦及于禍是日以河中節度使守太師兼尚書令西平王李繼麟為滑州節度使尋令朱守殷以兵圍其第誅之亦夷其族辛巳吐渾奚各遣使貢馬鎮州上言部民凍死者七千二百六十人又奏準宣進花果樹栽及抽樂人梅審譚赴京甲申以鄆州節度使永王存霸為河中節度使以滑州節度使申王存渥為鄆州節度使乙酉內人景姪上言昭宗遇難之時皇屬千餘人同時遇害為三

鈔本三

鈔本三

鈔本三

注有刪削  
似錄上幅

誅誅下 李通 留云 友謙 舊將史  
武等七人 時不利 史皆生 誅誅 孟  
以薛史為 於七人 姓名 石 為 全 載  
考 薛 易 史 丁 亥 殺 李 德 誠 之 將 史  
武 薛 政 宗 周 唐 殷 揚 師 太 王 景 宗  
夫 仁 白 奉 國 可 補 薛 史 亦 未 備

穴瘞于宮城西古龍興寺北請改葬從之仍詔河南府監護其事丙戌回鶻可汗阿都欲遣使貢良馬鎮州上言平棘等四縣部民餓死者二千五十人丁亥詔朱友謙同惡人史武等七人已當國法並籍沒家產武等友謙舊將時皆為刺史並以無罪族誅歐陽史丁亥殺李繼麟之將史武薛敬容周唐殷楊師太王景來仁白奉國滅其族二月己丑以宣徽南院使知內侍省兼內勾特進右領軍衛上將軍李紹宏為驃騎大將軍守左武衛上將軍知內侍省充樞密使甲午以鄭州刺史李紹奇為河陽節度使以樂人景進為銀青光祿大夫檢校右散騎常侍守御史大夫進以俳優嬖幸善采訪問巷鄙細事以啓奏復密求妓媵以進恩寵特厚魏州錢穀諸務及招兵市馬悉委進監臨孔謙附之以希寵常呼為八哥諸軍左右無不託附至于士人亦有因之而求仕進者每人言事左右紛然屏退惟以陷害熒惑為意焉是日帝幸冷



泉校獵乙未宰臣豆盧革上言請支州縣官實俸以責課效丙申武德使史彥瓊自鄴馳報稱今月六日貝州屯駐兵士突入都城剽劫坊市初帝令魏博指揮使楊仁晟率兵戍瓦橋至是代歸有詔令駐于貝州上歲天下大水十月鄴地大震自是居人或有一去他郡者每日族談巷語云城將亂矣人人恐悚皆不自安十二月以戶部尚書王正言爲興唐尹知畱守事正言年耄風病事多忽忘比無經治之才武德使史彥瓊者以伶官得幸帝待以腹心之任都府之中威福自我正言已下皆脅肩低首曲事不暇由是政無統攝姦人得以窺圖洎郭崇韜伏誅人未測其禍始皆云崇韜已殺繼岌自王西川故盡誅郭氏先是有密詔令史彥瓊殺朱友謙之子澶州刺史建徽史彥瓊夜半出城不言所往詰旦聞報正言曰史武德夜半馳馬而去不知何往是日人情震駭訛言云

劉皇后以繼岌死于蜀已行弒逆帝已晏駕故急徵彥瓊其言播于鄴市貝州軍士有私寧親于都下者掠此言傳于貝州軍士皇甫暉等因夜聚蒲博不勝遂作亂劫都將楊仁晟曰我輩十有餘年爲國家効命甲不離體已至吞併天下主上未垂恩澤翻有猜嫌防戍邊遠經年離阻鄉國及得代歸去家咫尺不令與家屬相見今聞皇后弒逆京邑已亂將士各欲歸府寧親請公同行仁晟曰汝等何謀之過耶今英主在上天下一家從駕精兵不下百萬西平巴蜀威振華夷公等各有家族何事如此軍人乃抽戈露刃環仁晟曰三軍怨怒咸欲謀反苟不聽從須至無禮仁晟曰吾非不知此但丈夫舉事當計萬全軍人卽斬仁晟裨將趙在禮聞軍亂衣不及帶將踰垣而遁亂兵追及白刃環之曰公能爲帥否否則頭隨刃落在禮懼卽曰吾能爲之眾遂呼謀中夜燔劫貝郡詰



新所使下書九國志趙道信不在宗  
入洛獨行直走唐福院陳又石時倫士  
卒多怨憤思脫者十七回走去進與本  
軍皇州輝等共指趙在魏相志在奪  
魏都城中士卒莫有門志進守  
固隔其城去踰水在魏兵數不若進  
折內三城也於使趙能作趙在魏城  
城署皇州輝八軍長趙道信為馬步  
都指揮使為八國志果

巨擁在禮趨臨清剽永濟館陶五日晚有自貝州來者言亂兵將  
犯都城都巡檢使孫鐸等急趨史彥瓊之第告曰賊將至矣請給  
鎧仗登陴拒守彥瓊曰今日賊至臨清計程六日方至為備未晚  
孫鐸曰賊來寇我必倍道兼行一朝失機悔將何及請僕射率眾  
登陴鐸以勁兵千人伏于王莽河逆擊之賊既挫勢須至離潰然  
後可以剪除如俟其凶徒薄于城下必慮奸人內應則事未可測  
也彥瓊曰但訓士守城何須即戰時彥瓊疑孫鐸等有他志故拒  
之是夜三更賊將攻北門彥瓊時以部眾在北門樓聞賊呼譟即  
時驚潰彥瓊單騎奔京師遲明亂軍入城孫鐸與之巷戰不勝攜  
其母自水門而出獲免捕晚趙在禮引諸軍據宮城署皇甫暉趙  
進等為都虞候斬斫使諸軍大掠興唐尹王正言謁在禮望塵再  
拜是日眾推在禮為兵馬留後草奏以聞帝怒命宋州節度使元

鈔本果  
席劉果

行欽率騎三千赴鄴都招撫詔徵諸道之師進討丁酉淮南楊溥  
遣使賀平蜀己亥魏王繼岌奏康延孝擁眾反迴寇西川遣副招  
討使任圜率兵追討之庚子福建節度副使王延翰奏節度使王  
審知委權知軍府事邢州左右步直軍四百人據城叛推軍校趙  
太為留後詔東北面副招討使李紹真率兵討之辛丑元行欽至  
鄴都進攻南門以詔書招諭城中趙在禮獻羊酒勞軍登城遙拜  
行欽曰將士經年離隔父母不取勅旨歸寧上貽聖憂追悔何及  
儻公善為敷奏俾從渙汗某等亦不敢不改過自新行欽曰上以  
汝輩有社稷功必行赦宥因以詔書諭之皇甫暉聚眾大詬即壞  
詔行欽以聞帝怒曰攻城之日勿遺噍類壬寅行欽自鄴退軍保  
澶州甲辰從馬直宿衛軍士王温等五人夜半謀亂殺本軍使為  
衛兵所擒磔于本軍之門丙午以右散騎常侍韓彥暉為戶部侍

鈔本收



郎丁未鄴都行營招撫使元行欽率諸道之師再攻鄴都戊申以洋州留後李紹文爲夔州節度使詔河中節度使永王存霸歸藩己酉以樞密使宋唐玉爲特進左威衛上將軍充宣徽南院使庚戌諸軍大集于鄴都進攻其城不克行欽又大治攻具城中知其無赦晝夜爲備朝廷聞之益恐連發中使促繼岌西征之師繼岌以康延孝據漢州中軍之士從任圓進討繼岌端居利州不獲東歸是日飛龍使顏思威部署西川宮人至辛亥淮南楊溥遣使貢方物西京上言客省使李巖押蜀主王衍至本府壬子以守太尉中書令河南尹兼河陽節度使齊王張全義爲檢校太師兼尙書令充許州節度使東川董璋奏準詔誅遂州節度使李令德于本州夷其族癸丑湖南馬殷奏福建節度使王審知疾甚副使王延翰已權知軍府事請降旄節司天監上言自二月上旬後晝夜陰

雲不見天象至二十六日方晴至月終星辰無變以右衛上將軍朱漢賓知河南府事甲辰命蕃漢總管李嗣源統親軍赴鄴都以討趙在禮帝素倚愛元行欽鄴城軍亂卽命爲行營招討使久而無功時趙太據邢州王景戡據滄州自爲留後河朔郡邑多殺長吏帝欲親征樞密使與宰臣奏言京師者天下根本雖四方有變陛下宜居中以制之但命將出征無煩躬御士伍帝曰紹榮討亂未有成功繼岌之軍尙留巴漢餘無可將者斷在自行樞密使李紹宏等奏曰陛下以謀臣猛將取天下今一州之亂而云無可將者何也總管李嗣源是陛下宗臣創業已來艱難百戰何城不下何賊不平威略之名振于夷夏以臣等籌之若委以專征鄴城之寇不足平也帝素寬大容納無疑于物自誅郭崇韜朱友謙之後閹宦伶官交相讒諂邦國大事皆聽其謀繇是漸多猜惑不欲大



臣典兵既聞奏議乃曰予恃嗣源侍衛卿當擇其次者又奏曰以臣等料之非嗣源不可河南尹張全義亦奏云河朔多事久則患生宜令總管進兵如倚李紹榮輩未見其功帝乃命嗣源行營是日延州知州白彥琛奏緩銀兵士剽州城謀叛魏王繼岌傳送郭崇韜父子首函至闕下詔張全義收瘞之乙巳以右武衛上將軍李肅為安邑解縣兩池權鹽使以吏部尚書李琪為國計使三月丁未朔李紹真奏收復邢州擒賊首趙太等二十一人徇于鄴都城下皆磔于軍門庚戌李紹真自邢州赴鄴都城下辛亥以威武軍節度副使福建管內都指揮使檢校太傅守江州刺史王延翰為福建節度使依前檢校太傅王子李嗣源領軍至鄴都營于西南隅甲寅進營于觀音門外下令諸軍詰旦攻城是夜城下軍亂迫嗣源為帝遲明亂軍擁嗣源及霍彥威入于鄴城復為皇甫暉

仍本閱

謂下李通能作丁巳朔與薛史果

城下不坐通能休康中李紹真引兵  
王都都督於城西以木牙徇于  
郭城下而教之與薛史亦

從審不 查該為史通能俱作從  
孫薛史本化前後俱作從審

趙進等所脅嗣源以詭詞得出夜分至魏縣時嗣源遙領鎮州詰且議欲歸藩上章請罪安重誨以為不可語在明宗紀中翼日遂次于相州元行欽部下兵退保衛州以飛語上奏嗣源一日之中遣使上章申理者數四帝遣嗣源子從審與中使白從訓資詔以諭嗣源行至衛州從審為元行欽所械不得達是日西面行營副招討使任圜奏收復漢州擒逆賊康延孝丙辰荆南高季興上言請割峽內夔忠萬等三州卻歸當道依舊管係又請雲安監初將議伐蜀詔高季興令率本軍上峽自收元管屬郡軍未進夔忠萬三州已降季興數請之因賂劉皇后及宰臣樞密使內外叶附乃俞其請戊午詔河南府預借今年夏秋租稅時年饑民因百姓不勝其酷京畿之民多號泣于路議者以為劉盆子復生矣庚申詔潞州節度使孔勅赴闕以右龍虎統軍安崇阮權知潞州是日忠

仍本閱



武軍節度使齊王張全義薨壬戌宰臣豆盧革率百官上表以魏博軍變請出內府金帛優給將士不報時知星者上言客星犯天庫宜散府藏又云流星犯天棊主御前有急兵帝召宰臣于便殿皇后出宮中妝奩銀盆各二并皇子滿哥三人謂宰臣曰外人謂內府金寶無數向者諸侯貢獻旋供賜與今宮中有者妝奩嬰孺而已可鬻之給軍革等惶恐而退癸亥以偽置昭武軍節度使林思謬爲閬州刺史是日出錢帛給賜諸軍兩樞密使及宋唐玉景進等各貢助軍錢幣是時軍士之家乏食婦女掇蔬于野及優給軍人皆負物而詬曰吾妻子已殍矣用此奚爲甲子元行欽自衛州率部下兵士歸帝幸耀店以勞之西川輦運金銀四十萬至闕分給將士有差元行欽請車駕幸汴州帝將發京師遣中官向延嗣馳詔所在誅蜀主王衍仍夷其族乙丑車駕發京師戊辰遣元

行欽將騎軍沿河東向壬申帝至滎澤以龍驤馬軍八百騎爲前軍遣姚彥溫董之彥溫行至中牟率所部奔于汴州時潘瓌守王村寨有積粟數萬亦奔汴州是時李嗣源已入于汴帝聞諸軍離散精神沮喪至萬勝鎮卽命旋師登路旁荒塚置酒視諸將流涕俄有野人進雉因問塚名對曰里人相傳爲愁臺帝彌不悅罷酒而去是夜次汜水初帝東出關從駕兵二萬五千及復至汜水已失萬餘騎乃畱秦州都指揮使張瑋以步騎三千守關帝過裴子谷道路險狹每遇衛士執兵仗者皆善言撫之曰適報魏王繼岌又進納西川金銀五十萬到京當盡給爾等軍士對曰陛下賜與太晚人亦不感聖恩帝流涕而已又索袍帶賜從官內庫使張容哥對曰頒給已盡衛士叱容哥曰致吾君社稷不保是此閣豎抽刀逐之或救而獲免容哥謂同黨曰皇后惜物不散軍人歸罪于



石橋下 李通鑑作甲中次石橋亦  
薛文果 政易史作甲戌中石橋  
此薛文果

吾輩事若不測吾輩萬段願不見此禍因投河而死隆平集內臣李承進連事唐莊宗大  
祖嘗問莊宗時事對曰莊宗好畋獵每次近郊衛士必控馬首曰兒郎輩寒冷望陛下與救接莊  
宗隨所欲給之如此者非一晚年蕭牆之禍由賞賚無節威令不行也太祖歎曰二十年來河戰  
爭不能以軍法約東此輩誠兒戲甲戌次石橋帝置酒野次悲啼不樂謂元行欽等諸  
將曰鄴下亂離寇盜蜂起總管迫于亂軍存亡未測今訛言紛擾  
朕實無聊卿等事予已來富貴急難無不共之今茲危蹙賴爾籌  
謀而竟默默無言坐觀成敗予在榮澤之日欲單騎渡河訪求總  
管面為方略招撫亂軍卿等各吐芻蕘共陳利害今日俾予至此  
卿等如何元行欽等百餘人垂泣而奏曰臣本小人蒙陛下撫養  
位極將相危難之時不能立功報主雖死無以塞責乞申後効以  
報國恩于是百餘人皆援刀截髮置鬚于地以斷首自誓上下無  
不悲號識者以為不祥是日西京留守張筠部署西征兵士到京  
見于上東門外晡晚帝還宮初帝在汜水衛兵散走京師恐駭不

丁丑朔下 李政易史及通鑑 五石春  
林傑作四月丁亥朔 考唐史天頭元  
年亦同元四年二月四月丁亥朔 惟詳  
史作丁丑朔 而書果 李安年五月  
丁未朔 日自否為丁丑 蓋唐史批  
考時實錄其月口有可徵行也

唐書下 李在都 曰時存唐 卿使  
謀之 亂在宗 大之 時去 惟在 卿力 武  
十餘人 宗宗 前手 卿協 定而 志亦 考  
薛文 何 揚 進 德 時 宗 親 軍 惟 考  
何 揚 進 德 時 宗 親 軍 惟 考

寧及帝至人情稍安乙亥百官進名起居安義節度使孔勣奏點  
校兵士防城準詔運糧萬石進發次時勣已殺監軍使據城詭奏  
也丙子樞密使李紹宏與宰相豆盧革韋說會于中興殿之廊下  
商議軍機因奏魏王西征兵士將至車駕且宜控汜水以俟魏王  
從之午時帝出上東門親閱騎軍誠以詰旦東幸申時還宮四月  
丁丑朔以永王存霸為北都留守申王存渥為河中節度使是日  
車駕將發京師從駕馬軍陳于寬仁門外步兵陳于五鳳門外帝  
內殿食次從馬直指揮使郭崇謙自本營率所部抽戈露刃至興  
教門大呼與黃甲兩軍引弓射興教門帝聞其變自宮中率諸王  
近衛禦之逐亂兵出門既而焚興教門緣城而入登宮牆謹諫帝  
御親軍格鬪殺亂兵數百俄而帝為流矢所中亭午崩于絳霄殿  
之廡下時年四十二璇玑集載宋實錄王全斌傳云同光末蕭牆有變亂兵逼宮城近  
臣宿將皆釋甲潛遁惟全斌與符彥卿等十數人居中拒戰莊宗



中流矢扶掖歸絳霄殿全斌慟哭而去東都事略符彥卿傳云郭從謙之亂莊宗左右皆引去惟彥卿力戰殺十餘人莊宗崩彥卿慟哭而去是時帝之左右例皆奔散唯五坊人善友斂廊下樂器簇于帝尸之上發火焚之及明宗入洛止得其燼骨而已天成元年七月丁卯有司上諡曰光聖神閔孝皇帝廟號莊宗是月丙子葬于雍陵五代史補莊宗之嗣位也志在渡河但恨河東地狹兵少思欲百練其眾以取必勝于天下乃下令曰凡出師騎軍不見賊不許騎馬或步騎前後已定不得越軍分以避險惡其分路並進期會有處不得違晷刻並在路敢言病者皆斬之故三軍懼法而戮力皆一以當百故朱梁舉天下而不能禦卒為所滅良有以也初莊宗為公子時雅好音律又能自撰曲子詞其後凡用軍前後隊伍皆以所撰詞授之使揭聲而唱謂之御製至于陣不論勝負馬頭纒轉則歌齊作故凡所圖戰人忘其死斯亦用軍之一奇也莊宗好獵每出未有不蹂踐苗稼一旦至中牟圍合忽有縣令忘其姓名犯圍諫曰大凡有國家者當視民如赤子性命所繫陛下以一時之娛恣其蹂踐使比屋囂然動溝壑之慮為民父母豈若是耶莊宗大怒以為遭縣令所辱遂叱退將斬之伶官鏡新磨者知其不可乃與羣伶齊進挽住命伴為諷責曰汝為縣令可以指麾百姓為兒既天子好獵即合多置閑地安得縱百姓耕鋤皆徧妨天子鷹犬飛走耶而又不能自責更敢咄咄吾知汝當死罪諸伶亦皆嘻笑繼和于是莊宗默然其怒少霽頃之恕縣令罪五代史闕文莊宗嘗因博戲觀戲子采有暗相輪者心悅之乃自置暗箭格凡博戲並認采之在下者及同光末鄴都兵亂從謙以兵犯與教門莊宗禦之中流矢而崩識者以為暗箭之應

史臣曰莊宗以雄圖而起河汾以力戰而平汴洛家讐既雪國祚

中興雖少康之嗣夏配天光武之膺圖受命亦無以加也然得之孔勞失之何速豈不以驕于驟勝逸于居安忘櫛沐之艱難徇色禽之荒樂外則伶人亂政內則牝雞司晨斬恡貨財激六師之憤怨徵搜輿賦竭萬姓之脂膏大臣無罪以獲誅眾口吞聲而避禍天有一于此未或不亡矧咸有之不亡何待靜而思之足以為萬世之炯戒也

莊宗大出天七十一百五十六

鈔本言

初不日形更

舊五代史卷三十四

舊五代史

卷三十四

九



舊五代史卷三十四攷證

唐莊宗紀八令朱守殷以兵圍其第 案圍其第歐陽史作圍其  
館胡三省云歐陽史蓋謂朱友謙無私第在洛陽也據雲谷雜  
記唐末藩鎮入朝館舍皆稱邸第似無庸更易其字通鑑仍從  
是書作第

三月丁未朔 丁未通鑑作丁巳

庚戌李紹真自邢州赴鄴都城下 案通鑑作庚申李紹真引兵  
至鄴都營於城西北以太等徇于鄴城下而殺之與是書異  
甲寅進營于觀音門外下令諸軍詰旦攻城是夜城下軍亂 案  
通鑑作壬戌李嗣源至鄴都甲子夜軍亂攷異引莊宗實錄作  
壬戌至鄴都癸亥夜軍士張破敗作亂與是書異日通鑑從是  
書



帝遣嗣源子從審 從審歐陽史及通鑑俱作從璟是書本紀前  
後俱作從審未知何據

帝幸耀店以勞之 耀店通鑑作鷓店胡三省注云薛史作耀店  
今仍其舊

甲戌次石橋 甲戌通鑑作甲申

四月丁丑朔 案歐陽史及通鑑五代春秋俱作四月丁亥朔攷

遼史天顯元年即同光四年亦作四月丁亥朔是書莊宗紀作

丁丑明宗紀作丁亥前後互異攷是年正月戊午朔三月丁未

朔則四月朔日當為丁丑

五坊人善友 案通鑑作鷹坊人善友胡三省注云鷹坊唐時五

坊之一也善姓也

安巴堅舊作阿保機今改 阿都欲舊作阿咄欲今改

卷三十四 四攷

舊五代史卷三十五

宋 薛 居 正 等 撰

唐書第十一

明宗紀

教下案原本作諱做故今從  
五代會要改正

明宗聖德和武欽孝皇帝諱亶初名嗣源及即位改今諱代北人  
也世事武皇及其錫姓也遂編于屬籍四代祖諱聿皇贈麟州刺  
史天成初追尊為孝恭皇帝廟號惠祖陵曰遂陵高祖妣衛國夫  
人崔氏追諡為孝恭昭皇后三代祖諱教皇贈朔州刺史追尊為  
孝質皇帝廟號毅祖陵曰衍陵曾祖妣趙國夫人張氏追諡為孝  
質順皇后皇祖諱瑋皇贈蔚州刺史追尊為孝靖皇帝廟號烈祖  
陵曰奕陵皇祖妣秦國夫人何氏追諡為孝靖穆皇后皇考諱寬  
皇贈汾州刺史追尊為孝成皇帝廟號德祖陵曰慶陵皇妣宋國



夫人劉氏追諡爲孝成懿皇后帝卽孝成之元子也以唐咸通丁亥歲九月九日懿皇后生帝于應州之金城縣初孝成事唐獻祖爲愛將獻祖之失振武爲吐渾所攻部下離散孝成獨奮忠義解蔚州之圍武皇之鎮鴈門也孝成厭代帝年甫十三善騎射獻祖見而撫之曰英氣如父可侍吾左右每從圍獵仰射飛鳥控弦必中尋隸武皇帳下武皇遇上源之難將佐罹害甚眾帝時年十七翼武皇踰垣脫難于亂兵流矢之內獨無所傷武皇鎮河東以帝掌親騎時李存信爲蕃漢大將每總兵征討師多不利武皇遂選帝副之所向克捷帝嘗宿于鴈門逆旅媼方娠不時具饌媼聞腹中兒語云大家至矣速宜進食媼異之遽起親奉庖爨甚恭帝詰之媼告其故北夢瑣言云帝以媼前僂後恭詰之曰公貴不可言也問其故具道媼子腹語事帝曰老媼遜言懼吾辱耳後果如其言帝旣壯雄武獨斷謙和下士每有戰功未嘗自伐居常惟治兵仗持廉處靜

晏如也武皇常試之召于泉府命恣其所取帝惟持束帛數緡而出凡所賜與分給部下嘗與諸將會諸將矜衒武勇帝徐曰公輩以口擊賊吾以手擊賊眾慙而止景福初黑山戍將王弁據振武叛帝率其屬攻之擒弁以獻乾寧三年梁人急攻兗鄆帥朱瑄求救于武皇武皇先遣騎將李承嗣史儼援之復遣李存信將兵三萬屯于莘縣聞汴軍益盛攻兗甚急存信遣帝率三百騎而往敗汴軍于任城遂解兗州之圍朱瑾見帝執手涕謝其年魏帥羅宏信背盟襲破李存信于莘縣帝奮命殿軍而還武皇嘉其功卽以所屬五百騎號曰橫衝都侍于帳下故兩河閒目帝爲李橫衝明年武皇遣大將軍李嗣昭率師下馬嶺關將復邢洺梁將葛從周以兵應援嗣昭兵敗退入青山口梁軍扼其路步兵不戰自潰嗣昭不能制會帝本軍至謂嗣昭曰步兵雖散若吾輩空迴大事



去矣爲公試決一戰不捷而死差勝被囚嗣昭曰吾爲卿副帝率其屬解鞍礪鏃憑高列陣左右指畫梁人莫之測因呼曰吾王命我取葛司徒他士可無併命卽徑犯其陣奮擊如神嗣昭繼進梁軍卽時退去帝與嗣昭收兵入關帝四中流矢血流被股武皇解衣授藥手賜卮酒拊其背曰吾兒神人也微吾兒幾爲從周所笑自青山之戰名聞天下天復中梁祖遣氏叔琮將兵五萬營于洞渦是時諸道之師畢萃于太原郡縣多陷于梁晉陽城外營壘相望武皇登陴號令不遑飲食屬大雨彌旬城壘多壞武皇令帝與李嗣昭分兵四出突入諸營梁軍由是引退帝率偏師追襲復諸郡邑昭宗之幸鳳翔也梁祖率眾攻圍岐下武皇奉詔應援遣李嗣昭周德威出師晉絳營于蒲縣嗣昭等軍大爲梁將朱友寧氏叔琮所敗梁之追兵直抵晉陽營于晉祠日以步騎環城武皇登

城督眾憂形于色攻城旣急武皇與大將謀欲出奔雲中帝曰攻守之謀據城百倍但兒等在必能固守乃止居數日潰軍稍集率敢死之士日夜分出諸門掩襲梁軍擒其驍將游崑崙等梁軍失勢乃燒營而退天祐五年五月莊宗親將兵以救潞州之圍帝時領突騎左右軍與周德威分爲二廣帝晨至夾城東北隅令斧其鹿角負芻填塹下馬乘城大譟時德威登西北隅亦譟以應之帝先入夾城大破梁軍是日解圍其功居最柏鄉之役兩軍旣成列莊宗以梁軍甚盛慮師入之怯欲激壯之手持白金巨鍾賜帝酒謂之曰卿見南軍白馬赤馬都否觀之令人膽破帝曰彼虛有其表耳翼日當歸吾廐中莊宗拊髀大笑曰卿已氣吞之矣帝引鍾盡醕卽屬鞬揮弭躍馬挺身與其部下百人直犯白馬都奮槌舞稍生挾二騎校而迴飛矢麗帝甲如蝟毛焉由是三軍增氣自辰



及未騎軍百戰帝往來衝擊執訊獲醜不可勝計是日梁軍大敗以功授代州刺史莊宗遣周德威伐幽州帝分兵略定山後八軍與劉守光愛將元行欽戰于廣邊軍凡八戰帝控弦發矢七中行欽酣戰不解矢亦中帝股拔矢復戰行欽窮蹙面縛乞降帝酌酒飲之拊其背曰吾子壯士也因厚遇之十三年二月莊宗與梁將劉鄩大戰于故元城北帝以三千騎環之鼓譟奮擊內外合勢鄩軍殆盡帝徇地磁洛四月相州張筠遁走乃以帝爲相州刺史九月滄州節度使戴思遠棄城歸汴小將毛璋據州納款莊宗命率兵慰撫既入城以軍府又安報莊宗書吏誤云已至滄州禮上畢莊宗省狀怒曰嗣源反耶帝聞之懼歸罪于書吏斬之未幾承制授邢州節度使十四年四月契丹索巴堅率眾三十萬攻幽州周德威間使告急莊宗召諸將議進取之計諸將咸言敵勢不能持

久野無所掠食盡自還然後踵而擊之可也帝奏曰德威盡忠于家國孤城被攻危亡在即不宜更待敵衰願假臣突騎五千爲前鋒以援之莊宗曰公言是也即命帝與李存審閻寶率軍赴援帝爲前鋒會軍于易州帝謂諸將曰敵騎以馬上爲生不須營壘況彼眾我寡所宜銜枚箝馬潛行溪澗襲其不備也八月師發上谷陰晦而雨帝仰天祈祝即時晴霽師循大房嶺緣澗而進翼日敵騎大至每遇谷口敵騎扼其前帝與長子從珂奮命血戰敵即解去我軍方得前進距幽州兩舍敵騎復當谷口而陣我軍失色帝曰爲將者受命忘家臨敵忘身以身殉國正在今日諸君觀吾父子與敵周旋因挺身入于敵陣以壯語諭之曰爾輩非吾敵吾當與天皇較力耳舞榭奮擊萬眾披靡俄挾其隊帥而還我軍呼躍奮擊敵眾大敗勢如席卷委棄鎧仗羊馬殆不勝紀是日解圍大



軍入幽州周德威迎帝執手獻欵九月班師于魏州莊宗親出郊  
勞進位檢校太保十八年十月從莊宗大破梁軍戴思遠于戚城  
斬首二萬級莊宗以帝爲蕃漢副總管加同平章事二十年代李  
存審爲滄州節度使四月莊宗卽位于鄴宮帝進位檢校太傅兼  
侍中尋命帝率步騎五千襲鄆州下之授天平軍節度使五月梁  
人陷德勝南城圍楊劉以扼出師之路帝孤守汶陽四面拒寇久  
之莊宗方解楊劉之圍九月梁將王彥章以步騎萬人迫鄆州自  
中都渡汶帝遣長子從珂率騎逆戰于遞坊鎮獲梁將任釗等三  
百人彥章退保中都莊宗聞其捷自楊劉引軍至鄆以帝爲前鋒  
大破梁軍于中都生擒王彥章等是日諸將稱賀莊宗以酒屬帝  
曰昨朕在朝城諸君多勸朕棄鄆州以爲河界賴副總管禦侮于  
前崇韜畫謀于內若信李紹宏輩大事已掃地矣莊宗與諸將議

兵所向諸將多云青齊徐兗皆空城耳王師一臨不戰自下惟帝  
勸莊宗徑取汴州語在莊宗紀中莊宗嘉之帝卽時前進莊宗繼  
發中都十月己卯遲明帝先至汴州攻封邱門汴將王瓚開門迎  
降帝至建國門聞梁主已殂乃號令安撫迴軍于封禪寺辰時莊  
宗至帝迎謁路側莊宗大悅手引帝衣以首觸帝曰吾有天下由  
公之血戰也當與公共之尋進位兼中書令二年正月契丹犯塞  
帝受命北征二月莊宗以郊天禮畢賜帝鐵券四月潞州小將楊  
立叛帝受詔討之五月擒楊立以獻六月進位太尉移鎮汴州代  
李存審爲蕃漢總管十二月契丹入寇二年正月帝領軍破契丹  
于涿州移授鎮州節度使先是帝領兵過鄴鄴庫素有御甲帝取  
五百聯以行是歲莊宗幸鄴知之怒甚無何帝奏請以長子從珂  
爲北京衙內都指揮使莊宗愈不悅曰軍政在吾安得爲子奏請

帝受命北征下其情與錄在宗在  
中隔不與費堂召奉局論事  
各收此記陽半或回中  
案而並者



吾之細鏡不奉詔旨強取其意何也令留守張憲自往取之左右說諭乃止帝憂恐不自安上表申理方解十二月帝朝于洛陽是時莊宗失政四方饑饉軍士匱乏有賣兒貼婦者道路怨咨帝在京師頗爲謠言所屬洎朱友謙郭崇韜無名被戮中外大臣皆懷憂懾諸軍馬步都虞候朱守殷奉密旨伺帝起居守殷陰謂帝曰德業震主者身危功蓋天下者不賞公可謂震主矣宜自圖之無與禍會帝曰吾心不負天地禍福之來吾無所避付之于天卿勿多談也四年二月六日趙在禮據魏州反莊宗遣元行欽將兵攻之行欽不利退保衛州初帝善遇樞密使李紹宏及帝在洛陽羣小多以飛語謗毀紹宏每爲庇護會行欽兵退河南尹張全義密奏請委帝北伐紹宏贊成之遂遣帝將兵渡河三月六日帝至鄴都趙在禮等登城謝罪出牲餼以勞師帝亦慰納之營于鄴城之

西南下令以九日攻城八日夜軍亂從馬直軍士有張破敗者號令諸軍各殺都將縱火焚營謹諫雷動至五鼓亂兵逼帝營親軍搏戰傷夷者殆半亂兵益盛帝叱之責其狂逆之狀亂兵對曰昨貝州戍兵主上不垂厚宥又聞鄴城平定之後欲盡坑全軍某等初無叛志直畏死耳已共諸軍商量與城中合勢擊退諸道之師欲主上帝河南請令公帝河北帝泣而拒之亂兵呼曰令公欲何之不帝河北則爲他人所有苟不見幾事當不測抽戈露刃環帝左右安重誨霍彥威躡帝足請詭隨之因爲亂兵迫入鄴城懸橋已發共扶帝越濠而入趙在禮等歡泣奉迎通鑑亂兵擁嗣源及李紹真等在禮等率諸校迎拜嗣源是日饗將士于行宮在禮等不納外兵軍眾擊張破敗斬之外兵皆潰趙在禮等率諸校迎拜嗣源

流散無所歸向帝登南樓謂在禮曰欲建大計非兵不能集事吾自于城外撫招諸軍帝乃得出夜至魏縣部下不滿百人時霍彥



威所將鎮州兵五千人獨不亂聞帝既出相率歸帝詰朝帝登城掩泣曰國家患難一至于此來日歸藩上章徐圖再舉安重誨霍彥威等曰此言非便也國家付以閩外之事不幸師徒逗撓爲賊驚奔元行欽狂妄小人彼在城南未聞戰聲無故棄甲如朝天之日信其奏陳何所不至若歸藩聽命便是強據要君正墮讒慝之口也正當星行歸闕面叩玉階讒聞阻謀庶全功業無便于此者也帝從之十一日發魏縣至相州獲官馬二千匹始得成軍元行欽退保衛州果以飛語上奏帝上章申理莊宗遣帝子從審及內官白從訓齎詔諭帝從審至衛州爲行欽所械帝奏章亦不達帝乃趨白臯渡駐軍于河上會山東上供綱載絹數船適至乃取以賞軍軍士以之增氣及將濟以渡船甚少帝方憂之忽有木柂數隻沿流而至卽用以濟師故無留滯焉二十六日至汴州莊宗領

兵至滎澤遣龍驤都校姚彥溫爲前鋒是日彥溫率部下八百騎歸于帝具言主上爲行欽所惑事勢已離難與共事帝曰卿自不忠言何悖也乃奪其兵仍下令曰主上未諒吾心遂致軍情至此宜速赴京師旣而房知溫杜晏球自北面相繼而至四月丁亥朔至畏子谷聞蕭牆釁作莊宗晏駕帝慟哭不自勝詰旦朱守殷遣人馳報京城大亂燔剽不息請速至京師已丑帝至洛陽止于舊宅分命諸將止其焚掠百官敝衣旅見帝謝之斂衽泣涕時魏王繼岌征蜀未還帝謂朱守殷曰公善巡撫以待魏王吾當奉大行梓宮山陵禮畢卽歸藩矣是日羣臣諸將上牋勸進帝面諭止之樞密使李紹宏張居翰宰相豆盧革韋說六軍馬步都虞候朱守殷青州節度使符習徐州節度使霍彥威宋州節度使杜晏球兗州節度使房知溫等頓首言曰帝王應運蓋有天命三靈所屬當



協冥符福之所鍾不可以謙遜免道之所喪不可以智力求前代  
因敗爲功殷憂啓聖少康重興于有夏平王再復于宗周其命維  
新不失舊物今日廟社無依人神之主天命所屬人何能爭光武  
所謂使成帝再生無以讓天下願殿下俯徇樂推時哉無失軍國  
大事望以教令施行帝優答不從壬辰文武百寮三拜牋請行監  
國之儀以安宗社答旨從之既而有司上監國儀注甲午幸大內  
興聖宮始受百寮班見之儀所司議卽位儀注霍彥威孔循等言  
唐之運歷已衰不如自創新號因請改國號不從土德帝問藩邸  
侍臣左右奏曰先帝以錫姓宗屬爲唐雪寃以繼唐祚今梁朝舊  
人不願殿下稱唐請更名號帝曰予年十三事獻祖以予宗屬愛  
幸不異所生事武皇三十年排難解紛櫛風沐雨冒刃血戰體無  
完膚何艱險之不歷武皇功業卽予功業先帝天下卽予天下也

兄亡弟紹于義何嫌且同宗異號出何典禮歷之衰隆吾自當之  
眾之莠言吾無取也時羣臣集議依違不定惟吏部尙書李琪議  
曰殿下宗室勳賢立大功于三世一朝雨泣赴難安定宗社撫事  
因心不失舊物若別新統制則先朝便是路人煢煢梓宮何所歸  
往不惟殿下追感舊君之義羣臣何安請以本朝言之則睿宗文  
宗武宗皆以弟兄相繼卽位柩前如儲后之儀可也于是羣議始  
定河中軍校王舜賢奏節度使李存霸以今月三日出奔不知所  
在乙未敕曰寡人允副羣情方監國事外安黎庶內睦宗親庶諧  
惇敘之規永保隆平之運昨京都變起禍難薦臻至于戚屬之間  
不測驚奔之所慮因藏竄濫被傷夷言念于茲自然流涕宜令河  
南府及諸道應諸王眷屬等昨因驚擾出奔所至之處卽時津送  
赴闕如不幸物故者量事收瘞以聞

北夢瑣言莊宗諸弟存紀存確匿于南山民家有人以報安重誨者重誨曰主上以



下詔尋訪帝之仁德必不加害不如密令殺之果併命于民家後明宗聞之切讓重誨傷惜久之

以中門使安重誨為樞密使以鎮州別駕張延朗為樞密副使以客將范延光為宣徽使進奏官馮贇為內客省使丙申下敕今年夏苗委人戶自供通頃畝五家為保本州具帳送省州縣不得差人檢括如人戶隱欺許人陳告其田倍徵己亥命石敬瑭權知陝州兵馬雷後皇子從珂權知河南府兵馬雷後庚子淮南楊溥進新茶以權知汴州軍州事孔循為樞密副使以陳州刺史劉仲殷為鄧州雷後以鄭州防禦使王思同為同州雷後敕曰租庸使孔謙濫承委寄專掌重權侵剝萬端姦欺百變遂使生靈塗炭軍士飢寒成天下之瘡痍極人間之疲弊載詳眾狀側聽輿辭難私降黜之文合正誅夷之典宜削奪在身官爵按軍令處分雖犯眾怒特貸全家所有田宅竝從籍沒是日謙伏誅敕停租庸名額依舊為鹽鐵戶部度支三司委宰臣

豆盧革專判中書門下上言請停廢諸道鹽運使內勾司租庸院大程官出放豬羊柴炭戶括田竿尺一依朱梁制度仍委節度刺史通申三司不得差使量檢州使公廨錢物先被租庸院管繫今據郤還州府州府不得科率百姓百姓合散蠶鹽每年祇二月內一度俵散依夏稅限納錢夏秋苗稅子除元徵石斗及地頭錢餘外不得紐配先遇赦所放逋稅租庸違制徵收竝與除放今欲曉告河南府及諸道準此施行從之是日宋州節度使元行欽伏誅壬寅以樞密副使孔循為樞密使

宋史卷七十一

初十日

舊五代史卷三十五

初六日

舊五代史



舊五代史卷三十五攷證

唐明宗紀一三代祖諱教 教原本作敖今據五代會要改正

皇考諱寬 歐陽史云父電未知孰是

襲破李存信於莘縣 莘縣原本作華縣今據新唐書藩鎮傳改正

柏鄉之役 柏鄉原本訛松鄉今據通鑑改正

吾當與天皇校力耳 天皇原本作人皇攷遼史太祖稱為天皇

讓宗追稱人皇莊宗初年侵幽州者乃太祖非讓宗也今改正

十二月契丹入寇三年正月帝領兵破契丹于涿州 案歐陽史

云冬契丹侵漁陽嗣源敗之于涿州入寇破敵皆作冬閒事蓋

順文併敘之耳當以是書為徵實

請令公帝河北 河北原本作河中今據通鑑改正



舊五代史卷三十六  
獲官馬二千匹 案歐陽史作掠小坊馬三千匹

四月丁亥朔 案丁亥朔與莊宗紀異據莊宗紀三月丁未朔則

四月當作丁丑據此紀下文有己丑甲午則當作丁丑前後參

差未詳孰是

己丑 案通鑑作乙丑疑傳寫之訛歐陽史從是書作己丑

以樞密副使孔循為樞密使 案歐陽史作左驍衛大將軍孔循

為樞密使吳縝纂誤云孔循傳作左衛大將軍為樞密使俱與

是書異

安巴堅舊作阿保機今改

舊五代史卷三十五攷證

舊五代史卷三十六

宋 薛 居 正 等 撰

唐書第十二

明宗紀二

天成元年夏四月丙午帝自興聖宮赴西宮文武百僚縞素于位

帝服斬衰親奉攢塗設奠哭盡哀乃于柩前即皇帝位百官易吉

服班于位帝御衮冕受冊訖百僚稱賀丁未羣官縞素赴西宮臨

以樞密使安重誨為檢校司空守左領軍大將軍依前充樞密使

宰臣豆盧革等三上表請聽政從之遣使往諸道及淮南告哀辛

亥帝始聽政于中興殿壬子西南面副招討使工部尚書任圜率

步騎二萬六千人入見甲寅帝御文明殿受朝制改同光四年為

天成元年大赦天下後宮內職量留一百人內官三十人教坊一



百人鷹坊二十人御廚五十人其餘任從所適諸司使務有名無實者並停分遣諸軍就食近畿以減饋送之勞秋夏稅子每斗先有省耗一升今後止納正數其省耗宜停天下節度防禦使除正至端午降誕四節量事進奉達情而已自于州府圓融不得科斂百姓其刺史雖遇四節不在貢奉諸州雜稅宜定合稅物色名目不得邀難商旅租庸司先將繫省錢物與人迴圖宜令盡底收納以塞倖門云乙卯渤海國王大諲譔遣使朝貢是月北京副留守知留守事張憲賜死以其失守故也五月丙辰朔帝不視朝臨于西宮宰相豆盧革進位左僕射韋說進位門下侍郎兼戶部尚書監修國史並依舊平章事兗州節度使檢校太傅朱守殷加同平章事充河南尹判六軍諸衛事滄州節度使檢校太傅安元信加同平章事移鎮徐州邠州節度使檢校太保毛璋加同平章事以

太子賓客鄭珏爲中書侍郎兼刑部尚書同中書門下平章事以工部尚書任圜爲中書侍郎兼工部尚書同中書門下平章事判三司徐州節度使李紹真貝州刺史李紹英齊州防禦使李紹虔河陽節度使李紹奇洛州刺史李紹能等上言前朝寵賜姓名今乞還舊內李紹虔上言臣本姓王後移杜氏蒙前朝賜今姓名乞復本姓詔並可之李紹真復曰霍彥威李紹英復曰房知溫李紹虔復曰王晏球李紹奇復曰夏魯奇李紹能復曰米君立青州節度使檢校太傅同平章事符習加兼侍中徐州節度使檢校太傅霍彥威加兼侍中移鎮鄆州丁巳初詔文武百僚正衙常參外五日一度內殿起居五代會要天成元年五月三日敕今後宰臣文武百官除常朝外每五日一度入內起居其中書非時有急切公事請開延英不在此限麟州奏指揮使張延寵作亂焚剽市民已殺戮訖戊午河陽節度使夏魯奇加檢校太傅以貝州刺史房知溫爲兗州節度使以齊



州防禦使王晏球爲宋州節度使以洛州刺史米君立爲邢州節度使已未賜文武百官驢馬各一西都知府張錢進魏王繼岌打毬馬七十二匹北京馬步都指揮使李從溫奏準詔誅宦官初莊宗遇內難宦者數百人竄匿山谷落髮爲僧奔至太原七十餘人至是盡誅于都亭驛辛酉詔華州放散西川宮人各歸骨肉壬戌以前相州刺史北京左右廂都指揮使安金全爲安北都護振武節度使同平章事甲子前西都留守京兆尹張筠加檢校太傅充山南西道節度使以夔州節度使李紹文爲遂州節度使以前鄆州留後戴思遠爲洋州節度使丁卯以金吾將軍張實爲金州防禦使戊辰以金紫光祿大夫檢校司空趙在禮爲滑州節度使加檢校太保制下在禮以軍情不順爲辭不之任以許州留後陶玘爲鄧州留後以諸道馬步副都指揮使安審通爲齊州防禦使庚

鈔本作各  
一馬一驢

午以權知北京軍府事汾州刺史符彥超爲晉州留後以前陳州刺史劉仲殷爲陝州留後癸酉以前磁州刺史劉彥琮爲同州留後甲戌福州節度使檢校太傅王延翰加檢校太尉同平章事乙亥翰林學士戶部侍郎知制誥馮道翰林學士中書舍人趙鳳俱以本官充端明殿學士端明之職自此始也五代會要明宗初登位四方書號即創端明學士之名命馮道等爲之丙子詔故西道行營都招討制置等使曉文義于是孔循獻議因唐室侍讀之守侍中監修國史兼樞密使郭崇韜宜許歸葬其世業田宅並還與骨肉故萬州司戶朱友謙可復護國軍節度使守太師兼尙書令河中尹西平王所有田宅財產並還與骨肉丁丑西都衙內指揮使張錢進納僞蜀主王衍犀玉帶各二條馬一百五十四匹初莊宗遣中官向延嗣就長安之殺王衍也旋屬蕭牆之禍延嗣藏竄不知所之而衍之資裝妓樂並爲錢所有復懼事泄故聊有此獻



戊寅以樞密使安重誨兼領襄州節度使制下重誨之黨謂重誨曰襄州地控要津不可乏帥無宜兼領重誨即自陳退許之以左金吾大將軍張遵誨為西京副留守知留守事辛巳以衛尉卿李懌為中書舍人充翰林學士壬午以前蔚州刺史張溫為振武畱後以左右廂突陣指揮使康義誠為汾州刺史以左右廂馬軍都指揮使索自通為忻州刺史尙父吳越國王錢鏐遣使進金器五百兩銀萬兩綾萬匹謝恩賜玉冊金印初同光季年鏐上疏密求玉冊金印郭崇韜進議以為不可而樞密承旨段徊受鏐重賂贊成其事莊宗即允其請至是故有貢謝甲申幽州節度使檢校太保李紹斌加檢校太傅同平章事復姓名為趙德鈞乙酉詔百官朔望入閣賜廊下食自亂離以前常參官每日朝退賜食于廊下謂之廊餐乾符之後百司經費不足無每日之賜至是遇入閣即

賜之

五代會要明宗初即位命百官五日一起居李琪以為非故事請罷之惟每月朔望日合入閣賜食至是宜旨朔望入閣外仍五日一起居遂為定式

六月戊

抄本三

子前襄州節度使李紹琪起復依前襄州節度使仍復本姓名曰劉訓以皇子河中畱後從珂為河中節度使百僚表賀以翰林承旨兵部尙書知制誥盧質為檢校司空充同州節度使己丑以吏部尙書判太常卿事李琪為御史大夫以禮部尙書崔協為太常卿判吏部尙書銓事以御史中丞崔居儉為兵部侍郎以太子賓客蕭頊為禮部尙書中書奏請以九月九日皇帝降誕日為應聖節休假三日從之故忠武軍節度使檢校太師兼尙書令齊王張全義贈太師以前尙書右丞崔沂為尙書左丞丙申新州畱後張承裕雲州畱後高行珪並正授本軍節度使丁酉詔曰四夷來王歷代故事前後各因強弱撫制互有典儀大蕃須示于威容即于正衙引對小蕃但推于恩澤仍于偏殿撫懷憲府奏論禮院詳酌



皆徵故實咸有明文正衙威容未可全廢內殿恩澤且可常行若  
遇大蕃入朝卽準舊儀于正殿排比鋪陳立仗百官排班于正門  
引入對見時百僚入閣班退後卻引對朝貢蕃客御史大夫李琪  
奏論之下禮部檢討而降是命焉戊戌樞密使安重誨加檢校太  
保行兵部尙書事如故以太子詹事劉岳爲兵部侍郎以太子右  
庶子王權爲戶部侍郎以太子左庶子任贊爲工部侍郎庚子荆  
南節度使檢校太師兼尙書令南平王高季興加守太尉兼尙書  
令澤潞節度使檢校太傅同平章事孔勅加兼侍中汴州屯駐控  
鶴指揮使張諫等謀叛伏誅以樞密使孔循權知汴州軍州事甲  
辰樞密使孔循加檢校太保守祕書監依前充使己巳以祕書少  
監姚顛爲左散騎常侍以太子左諭德陸崇爲右散騎常侍以兵  
部郎中蕭希甫爲左諫議大夫前幽州節度判官呂夢奇爲右諫

議大夫以鄴都副留守孫岳爲潁州團練使詔曰古者酌禮以制  
名懼廢于物取其難犯而易避貴便于時況徵在二名抑有前例  
以太宗文皇帝自登寶位不改舊稱時卽臣有世南官有民部靡  
聞曲避止禁連呼朕猥以眇躬託于人上止遵聖範非敢自尊應  
文書內所有二字但不連稱不得迴避如是臣下之名不欲與君  
親同字者任自改更丁未中書門下奏京城潛龍舊宅望以至德  
宮爲名從之戊申夏州節度使開府儀同三司檢校太師兼中書  
令朔方王李仁福加食邑一千戶以延州畱後高允韜爲延州節  
度使以利州節度觀察畱後張敬詢爲利州節度使劍南西川節  
度副大使知節度事孟知祥加檢校太傅兼侍中劍南東川節度  
副大使知節度事董璋加檢校太傅王子鳳翔節度使檢校太尉  
兼中書令李曦加檢校太師兼中書令汴州知州孔循奏召集謀



亂指揮使趙虔已下三十人並族誅訖甲寅以晉州留後符彥超  
 為北京留守以鎮州副使王建立為鎮州留後以右龍武統軍安  
 崇阮為晉州留後荆南節度使高季興上言夔忠萬三州舊是當  
 道屬郡先被西川侵據今乞卻割隸本管詔可之其夔州偽蜀先  
 會建節宜依舊除刺史通鑑攷異引十國紀年荆南史天成元年二月壬辰請忠夔萬  
 州及雲安監隸本道莊宗許之詔命未下莊宗遇弒六月壬辰  
 王表求三州明宗許之秋七月乙卯朔以太原舊宅為積慶宮庚申契丹渤海  
 國俱遣使朝貢甲子詔割韓城邵陽兩縣屬同州誅滑州左右崇  
 牙及長劍等軍士數百人夷其族作亂故也其都校于可洪等相  
 次到闕亦斬于都市丁卯以偽蜀守司空門下侍郎平章事晉國  
 公王諧為檢校司空守陵州刺史以虢州刺史石潭為耀州團練  
 使辛未詔諸道節度刺史文武將吏舊進月旦起居表今後除節  
 度留後團練防禦使惟正至進賀表其四孟月並且止絕甲戌中

書門下上言宣旨令進納新授諸道判官州縣官官告敕牒祇應  
 宣賜準往例除將相外並不賜官告即因梁氏起例凡宣授官並  
 特恩賜臣等商量自兩使判官令錄在京除授者即于內殿謝恩  
 便辭赴任不更進納官告判司主簿不合更許朝對敕下後望準  
 舊例處分從之乙亥莊宗皇帝梓宮發引帝衰服臨送于樓前是  
 日葬莊宗于雍陵鎮州留後王建立奏涿州刺史劉殷肇不受代  
 謀叛昨發兵收掩擒劉殷肇及其黨一十三人見折足勘詰己卯  
 以比部郎中知制誥楊凝式為給事中充史館修撰判館事以偽  
 蜀吏部尚書楊玢為給事中充集賢殿學士判院事升應州為彰  
 德軍節度仍以興唐軍為寰州隸彰德軍宰相豆盧革貶辰州刺  
 史韋說貶澌州刺史仍令所在馳驛發遣為諫議大夫蕭希甫疏  
 奏故也制略曰革則縱田客以殺人說則侵鄰家而奪井選元亨



之上第改王參之本名或主掌三司委元隨之務局或陶鎔百里  
愛長吏之桑田咸屈塞于平人互阿私于愛子任官匪當黷貨無  
厭謀人之國若斯致主之方安在既迷理亂又昧卷舒而府司案  
牘爰來諫署奏章疊至備彰醜迹深汙明庭是宜約以三章投之  
四裔其河南府文案及蕭希甫論疏竝宜宣示百僚庚辰賜蕭希  
甫衣段二十四銀器五十兩賞疏革說之罪也宰相鄭珣任圓再  
見安重誨救解革說請不復追行後命又三上表救解俱畱中不  
報辛巳以捧聖嚴衛左廂馬步軍都指揮使李從璋領饒州刺史  
充大內皇城使中書門下奏條制檢校官各納尙書省禮錢舊例  
太師太尉納四十千後減落至二十千太傅太保元納三十千減  
至十五千司徒司空元納二十千減至一十千僕射尙書元納一  
十五千減至七千員外郎中元納一十千今納三千四百者詔曰

會府華資皇朝寵秩凡霑新命各納禮錢爰自近年多隳舊制遂  
致紀綱之地遽成廢墮之司况累條流就從減省方當提舉宜振  
規繩但緣其間翊衛勳庸藩宣將佐自軍功而遷陟示恩澤以獎  
酬須議從權不在其例其餘自不帶平章事節度使及防禦團練  
刺史使府副使行軍已下三司職掌監務官州縣官凡關此例竝  
可徵納其檢校官自員外郎至僕射祗初轉一任納錢若不改呼  
不在徵納仍委尙書省部司專切檢舉置歷逐月具數申中書門  
下癸未詔辰州刺史豆盧革可責授費州司戶參軍澱州刺史韋  
說可責授夷州司戶參軍皆員外置同正員仍令馳驛發遣甲申  
又詔曰責授費州司戶參軍豆盧革夷州司戶參軍韋說等自居  
台輔累換歲華負先皇倚注之恩失大國變調之理朕自登宸極  
常委鈞衡略無謙遜之辭但縱貪饕之意除官受賂樹黨徇私每



虧敬于朕前徒自尊于人上道路之誼騰不已諫臣之條疏頗多  
罪狀顯彰典刑斯舉合從極法以塞羣情尙緣臨御之初含宏是  
務特軫墜泉之慮爰施解網之仁曲示優恩俯寬後命革可陵州  
長流百姓說可合州長流百姓仍委逐處長知所在同州長春宮  
判官朝請大夫檢校尙書禮部郎中賜紫金魚袋盧昇將仕郎  
守尙書屯田員外郎崇文館學士賜緋魚袋韋濤等各因權勢驟  
列班行無才業以可稱竊寵榮而斯久比行貶謫以塞尤違朕以  
纂襲之初含容是務父既寬于後命子宜示于特恩竝停見任昇  
濤卽革說之子也

初七日 扶春

舊五代史卷三十六

舊五代史卷三十六攷證

唐明宗紀二西都知府張錢

張錢原本作張鏐今據通鑑改正

故萬州司戶朱友謙

萬州原本作□州今據歐陽史改正

樞密承旨段徊

段徊九國志作段懷攷歐陽史及通鑑並作段

徊今仍其舊

正衙威容 正衙原本訛王衛今據冊府元龜改正

是日葬莊宗于雍陵

雍陵原本作永陵攷徐無黨五代史注莊

宗陵作雍陵石晉時避諱稱伊陵原本永字誤今改正又莊宗

葬日通鑑從哀冊文作丙于是書從實錄作乙亥

改王參之本名

案王參疑有舛誤據冊府元龜引薛史亦作王

參今無攷姑仍其舊



舊五代史卷三十六攷證

舊五代史卷三十七

宋薛居正等撰

唐書第十三

明宗紀三

天成元年秋八月乙酉朔日有食之有司上言莊宗廟室酌獻請  
奏武成之舞從之鄆州節度使霍彥威移鎮青州丁亥莊宗神主  
耐廟有司請祧懿祖室從之詔陵州合州長流百姓豆盧革韋說  
等可竝自長流後縱逢恩赦不在原宥之限豆盧昇韋濤仍削除  
自前所受官秩壬辰以久雨放百僚朝參詔天下疏理繫囚甲午  
汴州奏舊管曹州乞卻歸當道從之是日詔曰承前使府奏請判  
官率皆隨府除移停罷近年流例有異前規使府雖已除移判官  
元安舊職起今後若是朝廷除授者卽不計使府除移如是使府



奏請卽皆隨府移罷舊例藩侯帶平章事者所奏請判官殿中已上許奏緝中丞已上許奏紫今不帶平章事亦許同帶平章事例處分如防禦團練使奏請判官員外郎已下不在奏緝之限其所奏判官州縣官竝須將歷任告身隨奏至京如未有官假稱試攝亦奏狀內分明署出如藩鎮留後權知軍州事竝不在奏請判官之限如刺史要奏州縣官須申本道請發表章不得自奏近日州使奏請從事本無官緒妄結虛銜不計職位高卑多是請兼朱紫不惟紊亂實啓僥求宜令諸道州府切準勅命處分丁酉內出象笏三十四面賜百官之無笏者己亥帝御文明殿百官入閣月望如月朔之儀從新例也荆南高季興上言峽內三州請朝廷不除刺史幽州奏契丹寇邊詔齊州防禦使安審通率師禦之辛丑以前青州節度使符習爲鄆州節度使以前華州節度使史敬鎔爲

鈔本諸

安州節度使乙巳禁鎔錢爲器仍估定生銅器價斤二百熟銅器斤四百如違省價買賣者以盜鑄錢論丁未樞密使院條奏諸道節度使刺史內有不守詔條公行科斂須行止絕州使所納軍糧不得更邀加耗節度使刺史所置牙隊許于軍都內抽取便給省司衣糧況人數已多訪問尙有招致諸色人多有抵罪亡命便于州府投名爲使下元隨邀求職務凌壓平人及有力戶人于諸處行賂希求事務亦有州使妄稱修葺城池解宇科賦于人及營私宅諸縣鎮所受州使文符如涉科斂人戶不得稟受州府不得賒買行人物色兼行科率已前條件州使如敢犯違許人陳告勘詰不虛量行獎賞宜令三京諸道州府準此處分新授青州節度使霍彥威奏處斬新登州刺史王公儼及同謀拒命指揮使李謹王居厚等八人訖初同光中符習爲青州節度使宦官楊希望爲監

鈔本押

鈔本併



軍專制軍政趙在禮之據魏州習奉詔以本軍進討俄而帝爲亂  
軍所劫習卽罷歸希望遣兵邀之習懼而還至滑州帝遣人招之  
習至乃從帝入汴希望聞魏軍亂遣兵圍守習家欲盡殺之公儼  
素受希望獎愛謂希望曰內侍宜分腹心之兵監四面守陴者則  
誰敢異圖希望從之公儼乘其無備圍希望之第擒而殺之公儼  
遂與州將李謹等謀據州城以邀符節卽令軍府飛章畱已兼揚  
言符習在鎮人不便其政帝乃除公儼爲登州刺史公儼不時赴  
任卽以霍彥威代符習聚兵淄州以圖進取彥威至淄州會詔使  
至青州告諭公儼卽赴所任彥威懲其初心遣人擒公儼于北海  
縣與同黨斬于州東通鑑彥威聚兵淄州以圖進取公儼懼  
乙未始之官丁酉彥威至青州追擒之有司上言莊宗耐  
廟懿祖祧遷準例舍故而諱新懿祖例不諱忌日不行香從之王  
子襄州節度使劉訓加檢校太傅以僞蜀右僕射中書侍郎平章

鈔本無

事趙國公張格爲太子賓客充三司副使從任圖請也九月乙卯  
朔詔汴州扶溝縣復隸許州以前絳州刺史婁繼英爲冀州刺史  
充北面水陸轉運制置使己未幸至德宮遂幸前隰州刺史袁建  
豐之第帝嘗爲太原內牙親將建豐爲副至是建豐風疾沈發故  
親幸其第以撫之庚申以都官郎中庾傳美充三州搜訪圖籍使  
傳美爲蜀王衍之舊僚家在成都便于歸計且言成都具有本朝  
實錄及傳美使迴所得纔九朝實錄及殘缺雜書而已癸亥應聖  
節百僚于敬愛寺設齋召緇黃之眾于中興殿講論從近例也戊  
辰以僞蜀檢校太師兼中書令右金吾街使張貽範爲兵部尙書  
致仕都官員外郎于鄴奏請指揮不得書契券輒賣良人從之癸  
酉天策上將軍湖南節度使開府儀同三司守太師兼尙書令楚  
王馬殷加檢校太師守尙書令兩浙節度畱後靜海軍節度嶺南

五代史 卷三十七 本紀 三



西道觀察處置等使檢校太尉兼中書令錢元瓘加食邑中吳建武等軍節度嶺南東道觀察處置等使檢校太尉兼中書令錢元瓘加開府階進食邑甲戌以前代州刺史馬漑爲左衛上將軍致仕己卯以光祿卿羅周敬爲右金吾衛大將軍充街使辛巳以前復州刺史袁義爲唐州刺史詔曰鳳翔節度使李曦世聯宗屬任重蕃宣慶善有稱忠勤顯著旣在維城之例宜新定體之文是降寵光以隆惇敘俾煥成家之美貴崇猶子之親宜于本名上加從字癸未文武百僚至張全義私第柩前立班辭以來月二日葬故也冬十月甲申朔詔賜文武百僚冬服綿帛有差近例十月初寒之始天子賜近侍執政大臣冬服帝顧謂判三司任圜曰百僚散未圖奏曰臣聞本朝給春冬服徧及百僚喪亂已來急于軍旅人君所賜未能周給今止近臣而已外臣無所賜帝曰外臣亦吾臣

也卿宜計度園遂與安重誨據品秩之差以定春冬之賜其後遂以爲常右拾遺曹琮上疏內一件百僚朔望入閣及五日內殿起居請許三署寺監官輪次轉奏封事從之刑部員外郎孔莊上言自兵興已來法制不一諸道州縣常行柳杖多不依格律請以舊制曉諭改而正之丙戌吏部侍郎盧文紀上言請內外文武臣僚每歲有司明定考校將相乞迴御筆以行黜陟疏下中書門下商量宰臣奏請施行從之丁亥雲南嶺州山後兩林百蠻都鬼主右武衛大將軍李卑晚遣大鬼主傅能何華等來朝貢帝御文明殿對之百僚稱賀庚寅以客省使李嚴領泗州防禦使以河中節度副使李鱗爲太子賓客壬辰邠州節度使毛璋移鎮潞州巴州進嘉禾合穗甲午以前隰州刺史袁建豐遙領洪州節度使庚子幽州奏契丹平州守將僞署幽州節度使盧文進率戶口歸順百僚



稱賀辛丑契丹遣使來告哀言國主案巴堅以今年七月二十七日卒詔曰朕近繼皇圖恭修帝道務安夷夏貴洽雍熙契丹主世預歡盟禮交聘問遽聞凶訃倍軫悲懷可輟今月十九日朝參丙午以嶺州山後兩林百蠻都鬼主李卑晚為寧遠將軍大渡河山前印川六姓都鬼主懷安郡王勿鄧標沙為定遠將軍丁未幽州奏盧文進所率降戶孳畜人口在平州西首尾約七十里庚戌以吏部侍郎盧文紀為御史中丞時御史大夫李琪三上表求解任故也以兵部侍郎劉岳為吏部侍郎以戶部侍郎充端明殿學士馮道為兵部侍郎以中書舍人充端明殿學士趙鳳為戶部侍郎竝依前充職王子靜江軍節度使桂州管内觀察使檢校太師兼中書令扶風郡王馬賓加食邑實封澧朗觀察使檢校太傅兼侍中馬希振加檢校太尉盧文進至幽州遣軍吏奉表來上十一月

戊午以滄州雷後王景戡為邢州節度使青州奏得登州狀申契丹先攻逼渤海國自安巴堅身死雖已抽退尚雷兵馬在渤海扶餘城今渤海王弟領兵馬攻圍扶餘城內契丹次己未以翰林學士尚書戶部郎中知制誥劉昫為中書舍人充職辛酉以前祕書少監温輦為太子詹事壬戌以前房州刺史朱罕為潁州團練使是日詔曰應今日已前修蓋得寺院無令毀廢自此已後不得輒有建造如要願在僧門竝須官壇受戒不得衷私剃度癸丑日南至帝御文明殿受朝賀仗衛如式禮部侍郎裴皞上言諸州刺史經三考方請替移詔曰有政聲者就加恩澤無課最者即便替移密州獻芝草庚午河陽節度使夏魯奇移鎮許州雷後梁漢巖為邠州節度使淮南楊溥遣使貢獻賀登極乙亥以前振武雷後張温為利州昭武軍雷後以果州刺史孫鐸為漢州刺史充西川馬



步軍都指揮使壬午靜海軍節度安南管內觀察等使檢校太尉兼侍中錢元球加開府階進食邑癸未鎮州奏準詔盧文進所率歸業戶口蠲放租稅三年仍每日給糧五斗十二月戊子盧文進及將吏四百人見賜鞍馬玉帶衣被器玩錢帛有差詔曰朕中興寶祚復正皇綱萬國駢羅俱在照臨之內八紘遠負咸居覆載之閒矧彼雲南素歸正朔洎平僞蜀思錫舊恩于乃睠以雖深欲霽覃而未暇百蠻都首領李卑晚六姓蠻都首領勿鄧標沙等天資智勇世稟忠勤梯航之道路纔通琛賚之貢輸已至率其種落竭乃悃誠備傾向化之心深獎來庭之意今則各頒國寵別進王封其雋州刺史李及大鬼主離吠等或遙貢表函或躬趨朝闕亦宜特授官資各遷階秩勉敦信義無墜冊書示爾金石之堅保我山河之誓欽承休命永保厥終壬辰帝狩于近郊臘故也甲辰以契

丹盧龍軍節度使盧文進爲檢校太尉同平章事充滑州節度使戊戌詔嚴禁鐵錢庚子皇第二子金紫光祿大夫檢校司徒從榮加檢校太保同平章事天雄軍節度使鄴都留守以武安軍馬步軍都指揮使馬希範爲澧州刺史鐵林都知兵馬馬希杲爲衡州刺史壬寅潁州刺史孫岳加檢校太保獎能政也丙午中書門下奏故事藩鎮節度觀察使帶平章事于都堂上事刊石記壁合納禮錢三十貫以充中書及兩省公使今欲各納禮錢五百千于中書立石亭子鐫勒宰臣使相官氏授上年月餘充修葺中書及兩省公署都堂什物從之庚戌御史臺奏京城坊市士庶工商之家有婢僕自經投井非理物故者近者已來凡是死亡皆是臺司左右巡舉勘檢施行已久仍恐所差人吏及街市胥徒同于民家因事邀脅臣詢訪故事凡京城民庶之家死喪委府縣檢舉軍家委



軍巡商旅委戶部然諸司檢舉後具事由申臺其間或枉濫情故  
臺司訪聞即行舉勘如是文武兩班官吏之家即是臺司檢舉臣  
請自今已後竝準故事施行者詔曰今後文武兩班及諸道商旅  
凡有喪亡即準臺司所奏施行其坊市民庶軍士之家凡死喪及  
婢僕非理物故依臺司奏委府縣軍巡同檢舉仍不得縱其吏卒  
于物故之家妄有邀脅或恐暑月尸柩難停若待申聞檢舉縱無  
邀脅亦須經時日今後仰本家喚四鄰檢察若無他故逐便葬埋  
如後別聞枉濫妄有保證官中訪知勘詰不虛本戶鄰保竝行科  
罪如聞諸道州府坊市死喪取分巡院檢舉頗致淹停人多流怨  
亦仰約京城事例處分

亦案大典卷七十四

舊五代史卷三十七

舊五代史卷三十七攷證

唐書明宗紀三內出象笏三十四面 三十四歐陽史作三十二

僞蜀右僕射中書侍郎平章事趙國公張格 張格原本作張裕

攷舊唐書張濬傳濬次子格仕蜀為平章事今改正

僞署幽州節度使盧文進 盧文進遼史作盧國用蓋文進在遼

改名國用耳

國主安巴堅以七月二十七日卒 案遼史太祖紀作七月辛巳

上崩

可輟今月十九日朝參 案歐陽史作廢朝三日

契丹次 案契丹次蓋言契丹方即次也是書前後如攻城次鎮

州次多單用次字疑即當時案牘之文今仍其舊附識于此

安巴堅舊作阿保機今改



舊五代史卷三十七攷證

舊五代史卷三十八

宋薛居正等撰

唐書第十四

明宗紀四

天成二年春正月癸丑朔帝御明堂殿受朝賀仗衛如常儀制曰王者祇敬宗祧統臨寰宇必順體元之典特新制義之文朕以眇躬獲承不構襲三百年之休運繼二十聖之耿光馭朽納隍爰惕之心罔怠法天師古日躋之道惟勤今則載戢于戈渾同書軌荷玄穹之睠祐契兆庶之樂推檢玉泥金非敢期于薄德耕田鑿井誠有慕于前王將陳享謁之儀卽備郊丘之禮宜更稱謂永耀簡編今改名爲宣凡在中外宜體朕懷宣制訖百僚稱賀有司告郊廟社稷丙辰詔端明殿學士班位宜在翰林學士之上今後如有

社稷下堂楊文公設苑云唐時所  
神最重人君即位多至名後唐初  
其例明宗初名別後改名宣於是  
楊擅改撰先述其全壇及檀州州  
縣皆從改更則并偽字字不不改  
有明宗在御日下避諱一處以此  
今故詳史楊元述皆云初名檀唐  
天威中以宗改御名爲宣故改名  
述而後後今此國帝地若稱其初  
漢楊擅是擅在天威中未嘗改名  
又明宗初後皆稱檀州則地名不



轉改只于翰林學士內選任先是端明殿學士班在翰林學士之  
下又如三館例官在職上趙鳳轉侍郎日諷宰相府移之既而禁  
林序列有不可之言安重誨奏行此救時論便之癸亥宰臣鄭珏  
加特進門下侍郎兼太微宮使崇文館大學士任圜加光祿大夫  
門下侍郎監修國史以端明殿學士尚書兵部侍郎馮道為中書  
侍郎平章事集賢殿大學士以太常卿崔協為中書侍郎平章事  
戊辰以前鄧州節度使劉玘卒廢朝左拾遺李同上言天下繫囚  
請委長吏逐旬親自引問質其罪狀真虛然後論之以法庶無枉  
濫從之辛未皇子河中節度使從珂加同平章事以鎮州留後檢  
校司徒王建立為鎮州節度使檢校太傅癸酉皇第三子金紫光  
祿大夫檢校司徒從厚加檢校太保同平章事河南尹判六軍諸  
衛事北面副招討房知溫奏營州界奚陁羅支內附乙亥以監門

衛大將軍傅璉為右武衛上將軍丙子詔曰頃自本朝多難雅道  
中微皆尚浮華罕持廉讓其有除官蘭省命秩柏臺或以人事相  
疎或以私讎見誅稍乖敬奉遽至棄捐益司長之振威處君恩而  
何地今後應新授官朝謝後可準例上事司長不得輒以私事阻  
滯其本官亦不得因遭抑挫託故請假戊寅皇子從厚領事于河  
南府宰相鄭珏已下會送非例也己卯樞密使光祿大夫檢校太  
保行兵部尚書安重誨加開府儀同三司檢校太傅兼侍中樞密  
使檢校太保守祕書監孔循加檢校太傅同平章事詔崇文館依  
舊為宏文館初同光中宰相豆盧革以同列郭崇韜父名宏希其  
意奏改之今仍復焉辛巳詔曰亂離斯久法制多隳不有舉明從  
何禁止起今後三京及州使職員名目是押衙兵馬使騎馬得有  
暖坐諸都軍將衙官使下繫名糧者只得衣紫阜庶人商旅只著



白衣此後不得參雜兼有富戶或投名于勢要以求影庇或希假于攝貴以免丁徭仰所在禁勘以肅奸欺二月壬午朔新羅遣使朝貢丁亥以北京皇城使李繼朗為龍武大將軍北京都指揮使李從臻為左衛大將軍捧聖都指揮使李從璨為右監門衛大將軍戊子以前北面水陸轉運招撫使守冀州刺史烏震領宣州節度使庚寅陝州節度使檢校司徒石敬瑭加檢校太傅兼六軍諸衛副使壬辰西川節度使孟知祥奏泗州防禦使充西川兵馬都監李嚴煽搖軍眾尋已處斬以潁州刺史孫岳為耀州團練使丙申以從馬直指揮使郭從謙為景州刺史尋令中使誅之夷其族以其首謀大逆以弑莊宗也以尚書左丞崔沂為太子少保致仕壬寅制曰荆南節度使開府儀同三司守太尉兼尚書令南平王高季興可削奪官爵仍令襄州節度使劉訓充南面招討使知荆

南行府事許州節度使夏魯奇為副招討使統蕃漢馬步四萬人進討以其叛故也又命湖南節度使馬殷以湖南全軍會合以東川節度使董璋充東南面招討使新授夔州刺史西方鄴為副招討使共領川軍下峽州三面齊進通鑑攷異梓夔皆在荆南之西面而云東南面者蓋據夔梓所向言之甲辰

兗州節度使房知溫加同平章事宋州節度使王晏球加檢校太傅丁未以禮部尚書蕭頊為太常卿戊申以御史大夫李琪為右僕射以太子賓客李鱗為戶部尚書以吏部侍郎李德休為禮部尚書以前吏部侍郎崔貽孫為吏部侍郎以端明殿學士戶部侍郎趙鳳為兵部侍郎依前充職庚戌詔諸道節度使男及親嫡骨肉未沾恩命者特許上聞河南府新安縣宜為次赤以雍陵在其界故也辛亥以刑部侍郎歸藹為戶部侍郎三月壬子朔以中書舍人馬縞為刑部侍郎辛會節園宰相樞密使及在京節度使共

仍本名

仍本名  
李麟



進錢絹請開宴癸丑遣供奉官賈俊使淮南甲寅以西川節度副使李敬周爲遂州武信軍留後乙卯開府儀同三司司徒致仕趙光逢進太保致仕仍封齊國公以武信軍節度使李紹文卒廢朝丙辰宰臣判三司任圓奏諸道藩府請依天復三年已前許貢綾絹金銀隨其土產折進馬之直又請選孳生馬分置監牧竝從之五代會要任圓奏三京留守諸道節度觀察諸州防禦使刺史每年應聖節及正至等節貢奉或討伐勝捷各進獻馬伏見本朝舊事雖以獻馬爲各多將綾絹金銀折充馬價蓋跋涉之際護養稍難因此羣方俱爲定制自今後伏乞除蕃部進駝馬外諸州所進馬許依天復三年已前事例隨其土產折進價值直冀貢輸之稍易又誠敬之獲申兼欲于諸處揀孳生馬進舊制分置監牧仍委三司使別其制置奏聞太常丞段燾請國學五經博士各講本經以申橫經齒胃之義從之庚申以前澤潞節度使檢校太傅兼侍中孔勅爲河陽節度使壬戌幸甘水亭甲子青州節度使霍彥威加檢校太尉兼中書令以大內皇城使守饒州刺史李從璋爲應州節度使丁卯詔所在府縣糾察殺牛賣肉犯者準條科斷其自死牛卽許貨

鈔本等

鈔本顯

賣肉斤不得過五錢鄉村民家死牛但報本村所由準例輸皮入官癸酉以戶部郎中知制誥盧詹爲中書舍人夏四月辛巳朔房知溫奏前月二十一日盧臺戍軍亂害副招討寧國軍節度使烏震尋與安審通斬殺亂兵訖帝聞之廢朝一日贈震太傅新羅國遣使貢方物丁亥以華州留後劉彥琮爲本州節度使是日幸會節園宴近臣己丑以兵部侍郎崔居儉權知尚書左丞以戶部侍郎王權爲兵部侍郎以禮部侍郎裴皞爲戶部侍郎以翰林承旨守中書舍人李愚爲禮部侍郎充職庚寅御史臺奏今月三日廊下餐百官坐定兩省官方來自五品已下輒起詔曰每赴廊餐如對御宴若行私禮是失朝儀各罰半月俸五代會要長興三年五月詔文武兩班每遇入閣賜食從前御史臺官及諸朝官皆在敷政門外兩廊食惟北省官于敷政門內別坐既爲隔門各不相見致行坐不齊難于肅整今後每遇入閣賜食北省官亦宜于敷政門外東廊下設席以北首爲上待班齊一時詔盧臺亂軍龍睡所部鄴都奉節等九指揮二千五百人在

鈔本等  
列字

鈔本等



營家口骨肉竝可全家處斬龍睡所部之眾卽梁故魏博節度使楊師厚之所招置也皆天下雄勇之士目其都爲銀槍効節僅八千人師厚卒賀德倫不能制西迎莊宗入魏從征河上所向有功莊宗一統之後雖數頒賚而驕眾無厭同光末自貝州劫趙在禮據有魏博及帝繼位在禮冀脫其禍潛奏願赴朝覲遂除皇子從榮爲帥乃令北禦契丹是行也不支甲冑惟幟于長行表隊伍而已故俛首遄征在途聞李嚴爲孟知祥所害以爲劍南阻絕互相煽動及屯于盧臺會烏震代房知溫爲帥轉增浮說震與房知溫博于東寨日亭午大譟于營外知溫上馬出門爲甲士所擁且曰不與兒郎爲主更何處去知溫給之曰馬軍皆在河西步卒獨何爲也遂得躍馬登舟濟于西岸安審通戢騎軍不動知溫與審通謀伺便攻之令亂兵卷甲南行騎軍徐進部伍嚴整叛者相顧失

色列炬宵行疲于荒澤遲明潛令外州軍別行知溫等遂擊亂軍橫尸于野餘眾復趨舊寨至則已焚之矣翼日盡戮之脫于叢草溝塍者十無二三迨夜竄于山谷稍奔于定州及王都之敗乃無噍類矣癸巳兗州節度使房知溫加侍中齊州防禦使安審通加檢校太傅竝賞盧臺之功也丁酉僞吳楊溥遣移署右威衛將軍雷現貢端午禮幣辛丑以前利州節度使張敬詢爲雲州節度使遣樞密使孔循赴荆南城下時招討使劉訓有疾故也甲辰以戶部侍郎韓彥恂爲祕書監是日幸石敬瑭安重誨第丙午故振武節度使李嗣恩贈太尉以司封郎中樞密院直學士閻至爲左諫議大夫充職右諫議大夫梁文矩上言平蜀已來軍人剽略到西川人口甚多骨肉阻隔恐傷和氣請許收認帝仁慈素深因文矩之奏詔河南河北舊因兵火擄隔者竝從識認是日郢州進白鵲



五月癸丑以福建留後檢校太傅舒州刺史王延鈞為檢校太師  
守中書令充福建節度使琅琊郡王以太常卿蕭頊為吏部尚書  
是日懷州進白鵲戊午以三司副使守太子賓客張格卒廢朝以  
翰林學士駕部郎中知制誥竇夢徵為中書舍人充職癸亥遣宣  
徽使張延朗調發郡縣糧運赴荆南城下仍以軍法從事以右龍  
武統軍崔公實為左龍武統軍以前復州刺史高行周為右龍武  
統軍割果州屬郡乙丑偽吳楊溥貢新茶滄州進白鵲庚午詔罷  
荆南之師既而令軍士散掠居民而迴詔文武臣僚及諸道節度  
使刺史有父母在者各與恩澤宰臣任圜表辭三司事乃以樞密  
院承旨孟鵠充三司副使權判六月壬午華州邢州進兩歧麥充  
州進三足烏丙戌宰臣任圜落平章事守太子少保丁亥詔天下  
除併無名額寺院以宣徽北院使張延朗為右武衛大將軍判三

資治通鑑

卷三十一

五

西人下卷五代會要作五不出官  
各許薦薦附西人原本疑脫不  
二不  
安信入

司依前宣徽使檢校司徒辛卯大理少卿王鬱上言凡決極刑準  
敕合三覆奏近年已來全隳此法伏乞今後決前一日許一覆奏  
從之壬辰南面招討使知荊州南行府事襄州節度使檢校太傅  
劉訓責授檢校右僕射守澶州刺史訓南征無功故有是譴詔喪  
葬之家送終之禮不得過度乙未戶部尚書李鏘上言請朝班自  
四品已上官各許薦令錄兩人五品官各薦簿尉兩人功過賞罰  
與舉者同之詔從之其所舉人仍于官告內標所舉姓名或有不  
公連坐舉主仍令三品已上各舉堪任兩使判官者丙申以天策  
上將軍湖南節度使開府儀同三司檢校太師守尚書令楚王馬  
殷為守太師尚書令封楚國王庚子辛白司馬坡祭突厥神從北  
俗之禮也秋七月庚戌朔以宋州節度使王晏球充北面行營副  
招討使癸丑以左金吾將軍烏昭遠為左衛上將軍充八蠻國信

御本有

御本入



舊五代史 卷三十八  
使中書奏馬殷封楚國王禮文不載國王之制請約三公之儀用  
竹冊從之壬戌西川節度副大使知節度事孟知祥加檢校太尉  
兼侍中東川董璋加爵邑以左効義指揮使元習爲資州刺史右  
効義指揮使盧密爲雅州刺史癸亥幸冷泉宮甲子以檢校工部  
尙書謝洪爲宿州團練使夔州刺史西方鄴奏殺敗荆南賊軍收  
峽內三州丙寅升夔州爲寧江軍以鄴爲節度使戊辰詔曰頃因  
本朝親王遙領方鎮遂有副大使知節度事年代已深相沿未改  
其東川西川今後落副大使只云節度使庚午遂州留後李敬周  
鄜州留後劉仲殷竝正授本州節度使壬申兗州節度使房知溫  
移鎮徐州徐州節度使安元信移鎮襄州滄州節度使趙在禮移  
鎮兗州以齊州防禦使安審通爲滄州節度使是日詔陵州合州  
長流百姓豆盧革韋說等宜令逐處刺史監賜自盡其骨肉竝放

逐便是日逐段凝于遼州劉訓于濮州溫韜于德州甲戌太子少  
保任圜上表乞致仕仍于外地尋醫詔從之丁丑以左金吾大將  
軍曹廷隱爲齊州防禦使八月己卯朔日有食之辛巳以右諫議  
大夫孔昭序爲給事中以祕書少監崔慄爲右諫議大夫壬午以  
右驍衛大將軍劉衡爲左領衛上將軍以鄴都副留守趙敬怡爲  
右衛上將軍判興唐府事乙酉昆明大鬼主羅殿王普露靜王九  
部落各差使隨牂牁清州八郡刺史宋朝化等一百五十三人來  
朝進方物各賜官告繒綵銀器放還蕃丙戌以御史中丞盧文紀  
爲工部尙書以左諫議大夫梁文矩爲御史中丞鄧州留後陶玘  
貶嵐州司馬以其爲內鄉縣令盛歸仁所訟稅外科率故也仍賜  
歸仁緋袍魚袋癸巳幸皇子從榮第宣禁中伎樂觀宴從榮進馬  
及器幣帝因以伎樂賜之華州上言渭河泛濫害稼丁酉以吏部



郎中龔文宣公孔邈爲左諫議大夫史館修撰趙熙上言應內中  
公事及詔書奏對應不到中書者請委內臣一人抄錄月終送史  
館詔差樞密直學士錄送青州進芝草新州奏契丹乞置互市癸  
卯汴州節度使朱守殷加兼侍中鄆州節度使符習加檢校太尉  
甲辰皇子從榮娶鄆州節度使劉仲殷女是夕禮會百僚表賀九  
月辛亥義武軍節度使檢校太尉兼中書令王都加食邑實封幽  
州節度使趙德鈞加檢校太尉鎮州節度使王建立加同平章事  
僞吳楊溥遣使以應聖節貢獻己未以前雲州節度使高行珪爲  
鄧州節度使是日出御札曰歷代帝王以時巡狩一則遵乎禮制  
一則按察方區矧彼夷門控茲東夏當先帝戡平之始爲眇躬殿  
守之邦俗尙貞純兵懷忠勇自元臣鎮靜庶事康和兆民咸樂于  
有年闔境彌堅于望幸事難違眾議在省方朕取十月七日親幸

汴州庚申以衛尉卿李延光爲大理卿北京留守李彥超上言先  
父存審本姓符氏蒙武皇賜姓乞卻還本姓從之乙丑夏州節度  
使李仁福鳳翔節度使李從曠朔方節度使韓洙並加食邑改賜  
功臣以汝州防禦使趙延壽爲河陽節度使以比部郎中知制誥  
劉贊爲中書舍人以河陽掌書記程遜爲比部員外郎知制誥以  
代州刺史李德珙爲蔚州刺史丙寅樞密使孔循兼東都留守襄  
州夏魯奇上言荆南高季興遣使持書乞修貢奉詔魯奇不納詔  
諸州錄事參軍不得兼使府賓職己巳鄧州節度使史敬鎔加檢  
校太保同州節度使盧質加檢校司徒御史臺奏每遇入閣舊例  
只一員侍御史在龍墀邊祇候彈奏公事或有南班失儀點檢不  
及今欲依常朝例差殿中侍御史二員押鐘鼓樓位仍各綴供奉  
班出入從之以青州節度副使溥于晏爲亳州團練使契丹遣使



美稜瑪古已下朝貢戊寅西川奏據黎州狀雲南使趙和于大渡  
 河南起舍一間畱信物十五籠并雜牋詩一卷遞至闕下冬十月  
 己卯朔帝御文明殿視朝癸未亳州刺史李鄴貶郴州司戶又貶  
 崖州長流百姓所在賜自盡判官樂文紀配邢州責其違法贖貨  
 也乙酉駕發西京詔畱宰相崔協以奉祠祭丁亥帝宿于滎陽汴  
 州朱守殷奏都指揮使馬彥超謀亂已處斬訖戊子次京水知朱  
 守殷反帝親統禁軍倍程前進翼日至汴州攻其城拔之守殷伏  
 誅丙申磁州刺史藥縱之上言今月十二日供奉官王仁鎬至稱  
 制殺太子少保致仕任圜契丹遣使持書求碑石欲為其父表其  
 葬所戊戌詔曰諸道州府自同光三年已前所欠秋夏稅租并主  
 持務局敗闕課利并沿河舟船折欠天成元年殘欠租稅竝特與  
 除放時重誨既構任圜之禍恐人非之思沛恩于眾以掩已過乃

奏曰三司積欠約二百萬貫虛繫帳額請並蠲放帝重違其意故  
 有是詔時議者以蠲隔年之賦猶或惠民場院課利一概除之得  
 不啓奸倖之門乎己亥詔曰太子少保致仕任圜早推動舊曾委  
 重難既退免于劇權俾優閒于外地而乃不遵禮分潛附守殷緘  
 題罔避于嫌疑情旨頗彰于怨望自收汴壘備見蹤由若務含宏  
 是孤典憲尙全大體止罪一身己令本州私第自盡其骨肉親情  
 僕使等竝皆放罪辛丑詔曰后來其蘇動必從于人欲天監厥德  
 靜宜布于國恩近者言幸浚郊暫離洛邑蓋逢歲稔共樂時康不  
 謂奸臣遽彰逆狀為厲之階既甚覆宗之禍自貽俾我生靈遭茲  
 紛擾永言軫惻無輟寐興宜覃雨露之恩式表雲雷之澤應汴州  
 城內百姓既經驚劫宜放二年屋稅諸處有曾受逆人刻字者隨  
 處焚毀應天下見禁囚徒除十惡五逆殺人放火劫盜合造毒藥



官典犯贓偽行印信屠牛外罪無輕重竝從釋放應有民年八十已上及家長者有廢疾者免一丁差役云以山南西道節度使張筠爲西京畱守行京兆尹青州節度使霍彥威差人走馬進箭一對賀誅朱守殷帝卻賜彥威箭一對傳箭蕃家之符信也起軍令眾則使之彥威本非蕃將以臣傳箭于君非禮也癸卯以權知汴州事陝州節度使石敬瑭爲汴州節度使兼六軍諸衛副使侍衛親軍馬步都指揮使鳳翔奏地震丙午威武軍節度副使檢校太尉守建州刺史王延直加同平章事守建州刺史充奉國軍節度副使兼威武軍節度副使詔割施州卻屬黔南十一月己酉帝祭蕃神于郊外庚戌以皇城使行袁州刺史李從敏爲陝州節度使乙卯青州霍彥威鄆州符習來朝以太子詹事溫輦爲吏部侍郎徐州房知溫來朝戊午黔南節度使李紹義加檢校太保庚申皇

原校云明  
定既改石  
重似石  
神疑原本  
有誤  
楊本改作

子河中節度使檢校太保同平章事從珂鄴都畱守檢校太保同平章事從榮河南尹判六軍諸衛事檢校太保同平章事從厚竝加檢校太傅進爵邑貝州刺史竇廷琬上言請制置慶州青白兩池逐年出絹十萬匹米萬石詔升慶州爲防禦所以廷琬爲使壬申詔霍彥威等歸藩詔太宗朝左僕射李靖可冊贈太保鄭州僕射陂可改爲太保陂時議者以僕射陂者後魏孝文帝賜僕射李冲故因以爲名及是命之降以爲李靖蓋誤也契丹遣使摩琳等率其屬來乞通和十二月戊寅朔以前鳳翔畱後高允貞爲右監門上將軍詔以施州爲夔州屬郡以其便近故也遣飛勝指揮使于契丹賜契丹主錦綺銀器等兼賜其母繡被瓔珞己卯蔚州刺史周令武得代歸闕帝問北州事令武奏曰北山甚安諸蕃不相侵擾鴈門已北東西數千里斗粟不過十錢帝悅顧謂左右曰須

原校云此  
腹指不  
似脫人石



行善事以副天道居數日帝延宰臣于太德殿言及民事馮道奏曰莊宗末年不撫軍民惑于聲樂遂致人怨國亂陛下自膺人望歲時豐稔亦消化所致也更願居安思危帝然之許州地震庚辰皇子鄴都畱守從榮移鎮太原以北京畱守符彥超為潞州節度使乙酉以彰國軍節度使李從璋昧于政理詔歸闕敕新及第進士有聞喜宴逐年賜錢四十萬己丑兗州節度使趙在禮來朝詔出潛龍宅米以賑百官壬辰以太傅致仕齊國公趙光逢卒輟朝丙申許州節度使夏魯奇移鎮遂州庚子辛石敬瑭公署及康義誠私第甲辰狩于東郊臘也丙午追尊四廟以應州舊宅為廟

舊五代史卷二十八

舊五代史卷二十八攷證

唐明宗紀四遣供奉官賈俊使淮南 賈俊九國志作賈進攷冊府元龜所引薛史亦作俊今仍其舊

房知溫奏前月二十一日盧臺戍軍亂害副招討寧國軍節度使烏震尋與安審通斬殺亂兵訖 案五代春秋盧臺戍軍亂房

知溫討平之據是書房知溫傳及通鑑知溫初誘戍軍為亂繼恐事不濟乃與安審通謀討亂兵也五代春秋所書殊非事實

五品官各薦簿尉兩人 案五代會要作五品六品官各許薦簿尉兩人

所舉姓名或有不公 案原本脫公字今據五代會要增入夔州刺史西方鄴奏殺敗荆南賊軍收峽內三州 案通鑑六月

西方鄴敗荆南水軍于峽中復取夔忠萬三州是書繫七月甲



子蓋以奏聞之日為據歐陽史與是書同

詔陵州合州長流百姓豆盧革韋說等宜令逐處刺史監賜自盡  
案五代春秋作元年七月殺豆盧革韋說攷歐陽史元年七  
月貶豆盧革為辰州刺史韋說澱州刺史甲申流革于陵州說  
于合州二年七月殺豆盧革韋說與是書同五代春秋統繫于  
元年誤也

今月十二日供奉官王仁鎬至稱制殺太子少保致仕任圜案

安重誨害任圜五代春秋及通鑑俱不書日歐陽史作乙未殺

太子少保致仕任圜據是書作十二日是年十月為己卯朔十

二日乃庚寅也與歐陽史異日

美稜瑪古舊作梅老沒骨今改 摩琳舊作梅老今改

舊五代史卷三十八攷證

舊五代史卷三十九

宋 薛 居 正 等 撰

唐書第十五

明宗紀五

天成三年春正月戊申朔帝御崇元殿受朝賀仗衛如式辛亥前  
河陽節度使檢校太傅兼侍中孔勅以太子太傅致仕癸丑詔取  
今月十七日幸鄴都甲寅以國子祭酒朱守素卒廢朝丙辰以鎮  
南軍節度使袁建豐卒廢朝詔贈太尉丁巳詔曰朕聞堯舜有恤  
刑之典貴務好生禹湯申罪己之言庶明知過今月十七日據巡  
檢軍使渾公兒口奏稱有百姓二人以竹竿習戰鬥之事朕初聞  
奏報實所不容率爾傳宣令付石敬瑭處置今日重誨敷奏方知  
悉是幼童為戲載聆讜議方覺失刑循揣再三愧惕非一亦以渾



公兒誑誣頗甚石敬瑭詳覆稍乖致人枉法而殂處朕有過之地  
今減常膳十日以謝幽冤其石敬瑭是朕懿親合施極諫既茲錯  
誤宜示省循可罰一月俸渾公兒決脊杖二十仍銷在身職銜配  
流登州小兒骨肉賜絹五十匹粟麥各百石便令如法埋葬兼此  
後在朝及諸道州府凡有極刑竝須子細裁遣不得因循百寮進  
表稱賀已未中書門下奏國子祭酒望令宰相兼判乃詔崔協判  
之五代會要載原奏云祭酒之資歷朝所貴愛從近代不重此官況屬聖朝方勤庶政須宏雅道以振時風望令宰臣一員兼判國子祭酒辛酉以前潞州  
節度使毛璋為右金吾上將軍以左驍衛上將軍華溫琪為右金  
吾大將軍以春州刺史張虔釗為鄭州防禦使時契丹方陷平州  
癸亥詔應廟諱文字止避正文其偏旁文字不用虧缺點畫契丹  
遣使扣諾巴摩哩等貢獻帝遣指揮使奔托山押國信賜契丹主  
妻戊辰以隨駕馬軍都指揮使富州刺史康義誠兼領鎮南軍節

平州下安武政易史作丁巳契丹  
臨平州通鑑不書日

此不舊本作光內悲極老今改

度使以隨駕步軍都指揮使潮州刺史楊漢章遙領寧國軍節度  
使中書上言舊制遇二月十五日為聖祖降聖節應休假三日準  
會昌元年二月勅休假一日請準近勅從之吐蕃伊埒雅遜等六  
人回鶻米里都督等四人竝授歸德懷遠將軍悉放還蕃庚午冊  
贈故瀛州刺史李嗣顏為太尉壬申冊贈故皇子檢校司空從謹  
為太保甲戌制以楚國夫人曹氏為淑妃以韓國夫人王氏為德  
妃仍令所司擇日冊命二月丁丑朔有司上言太陽合虧既而有  
雲不見羣臣表賀詔巡幸鄴都宜寧庚辰偽吳楊溥遣使貢獻賀  
誅朱守殷帝以荆南拒命通連淮夷不納其使遣還壬午以光祿  
卿韋寂卒廢朝贈禮部尚書癸未工部尚書盧文紀貶石州司馬  
員外安置文紀私諱業時新除于鄴為工部郎中舊例寮屬名與  
長官諱同或改其任文紀素與宰相崔協有隙故中書未議改官

物本三改  
三子孫仍  
本改主  
物本作王

抵抄本改  
小字括例  
本改

物本停



王將軍下 李通鑑作左衛正將  
軍 政易史 張武 侯 薛 史 作 左  
衛 衛

殿下 李 李 河 山 去 頁 政 易 史 作  
成 成

于鄴授官之後文紀自請連假鄴尋就位及差延州官告使副未  
行文紀參告且言侯鄴迴日終請換曹鄴其父遂自經而死故文  
紀貶官以倉部郎中何澤為吏部郎中獎伏閣諫巡幸鄴都也丁  
亥天德軍節度使郭承豐加檢校司徒辛卯以山南西道節度使  
張筠為左驍衛上將軍詔中外羣臣父母亡沒者竝與追封贈癸  
巳以禮部尚書崔貽孫卒輟朝甲午以吐渾寧朔奉化兩府都知  
兵馬使李紹魯為吐蕃寧朔府都督乙未以樞密使兼東都留守  
孔循為許州節度使兼東都留守鄧州節度使高行珪移鎮安州  
應州節度使李從璋移鎮滑州滑州節度使盧文進移鎮鄧州丁  
酉以責授檀州刺史劉訓為右龍武大將軍己亥回鶻可汗仁喻  
遣都督李阿爾珊等貢獻王寅以左金吾大將軍羅周敬為同州  
節度使甲辰以威塞軍節度使張廷裕卒廢朝詔贈太保以耀州

持竹本  
剛一字改  
一字

團練使孫岳為閬州團練使以左監門上將軍高允貞為右金吾  
衛大將軍以右金吾衛大將軍華溫琪為左金吾衛大將軍三月  
丁未朔以久雨為災詔文武百辟極言時政得失丁巳以邢州節  
度使王景戡為華州節度使以前北京副留守李從溫為邢州節  
度使己未以宰臣鄭珏為開府儀同三司左僕射致仕加食邑五  
百戶庚辰以前復州刺史翟章為新州威塞軍留後中書奏孟夏  
薦饗合宰相行事在朝只有宰相二員今東都留守孔循帶平章  
事宜令攝太尉行事孔循稱使相有戎機不當司祠祭重事癸亥  
以前鎮州節度使王建立為右僕射兼中書侍郎平章事集賢殿  
大學士判三司西方鄴上言收復歸州以前鄭州刺史楊漢賓為  
洋州武定軍留後戊辰以前彰國軍節度副使陳臯為鳳州武興  
軍留後以前蔡州刺史孫漢韶為應州彰國軍留後以宣徽南院

局本脫  
三字



使范延光爲樞密使以宣徽北院使判三司張延朗爲宣徽南院使以前冀州刺史婁繼英爲耀州團練使以懷州刺史張廷蘊爲金州防禦使己巳命范延光權知鎮州軍府事西方鄴奏于歸州殺敗荆南賊軍數千人時有太白山道士解元龜自西川至對于便殿稱年一百一歲既而上表乞西都畱守兼西川制置使要修西京宮闕帝謂侍臣曰此人老耄自遠來朝方期別有異見反爲身名甚可笑也賜號爲知白先生賜紫放歸山甲戌冊回鶻可汗仁喻爲順化可汗夏四月戊寅以汴州節度使石敬瑭爲鄴都畱守充天雄軍節度使加同平章事以樞密使權知鎮州軍府事檢校太保范延光爲鎮州節度使兼北面水陸轉運使以司農卿鄭績爲太僕卿壬午夔州節度使東南面副招討使西方鄴加檢校太保甲申皇第三女石氏封永寧公主第十三女趙氏封興平公

仍本晚  
五字

仍本比

主仍令所司擇日冊命幽州上言契丹有書求樂器乙酉達鞠遣使朝貢以隨駕馬軍都指揮使康義誠爲侍衛親軍馬步軍都指揮使丙戌樞密使安重誨兼河南尹以皇子河南尹判六軍諸衛事從厚爲汴州節度使判六軍如故丁亥復州奏湖南大破淮賊于道人磯以西川馬步軍都指揮使趙廷隱兼漢州刺史從孟知祥之請也九國志趙廷隱傳知祥至蜀康延孝陷漢州遣廷隱率兵擊破之擒延孝檻送闕下知祥奏加檢校司空漢州刺史遂畱屯成都洋州上言重開入蜀舊路三百餘里比今官路較二十五程而近癸巳殿中少監石知訥貶憲州司戶坐煽惑軍鎮也北面副招討宋州節度使王晏球以定州節度使王都反狀聞庚子制義武軍節度使檢校太尉兼中書令太原王王都削奪官爵壬寅以王晏球爲北面行營招討使知定州行軍州事以滄州節度使兼北面行營馬軍都指揮使安審通爲副招討使兼諸道馬軍都指揮使以左散騎

仍本云

及此同下 孝泰 文作三月王都以  
定州 奉 歸 五化 奉 教 公 通 能 是  
程 詳 史 作 四 月



常侍蕭希甫兼判大理卿事西京奏前樞密使張居翰卒五月乙巳朔回鶻可汗仁喻封順化可汗丁未鄴都畱守天雄軍節度使石敬瑭河陽節度使趙延壽並加駙馬都尉以右僕射李琪為太子少傅辛亥沙州節度使曹義金加爵邑王晏球上言收奪得定州北西二關城癸丑湖南馬殷奏二月中大破淮寇二萬生擒將士五百餘人中書上言諸道薦人總與不可全阻又難今後節度使每年許薦二人帶使相者許薦三人團練防禦使各一人節度觀察判官並聽旨授書記已下即許隨府從之以六軍判官尚書司封郎中史圭為右諫議大夫充樞密直學士詔州縣官以三十月為考限刺史以二十五月為限以到任日為始己未幽州奏契丹託諾領二千騎西南趨定州以前同州節度使盧質行兵部尚書判太常卿事辛酉以天雄軍節度副使判興唐府事趙敬怡為

據本改  
下同

樞密使詔曰上柱國勲之極也近代已來文臣官階稍高便授柱國歲月未深便轉上柱國武資初官便授上柱國今後凡加勲先自武騎尉十二轉方授上柱國永作成規不令踰越丁卯鎮州奏今月十八日王師不利于新樂壬申王晏球奏今月二十一日大破定州賊軍及契丹于曲陽斬獲數千人王都與託諾以數十騎復入于定州六月己卯以右金吾上將軍毛璋為左金吾上將軍以前安州節度使史敬鎔為右金吾上將軍以前華州節度使劉彥琮為左武衛上將軍壬午放內園鹿七頭于深山乙酉皇子故金槍指揮使檢校左僕射從璟贈太保己丑幽州趙德鈞奏殺契丹千餘人于幽州東獲馬六百匹壬辰宰臣馮道率百寮上表請上尊號曰聖明神武文德恭孝皇帝詔報不允丙申馮道等再上尊號不允戊戌以西京副畱守知畱守事張遵誨行京兆尹秋七



月乙巳詔故僞蜀主王衍追封順正公以諸侯禮葬丙午以前武  
信軍節度使李敬周爲邠州節度使丁未以滄州節度使安審通  
卒于師輟朝壬子以朔方節度使韓洙卒廢朝甲寅王晏球奏六  
月二十二日進攻逆城將士傷者三千人時晏球知城中有備未  
欲急攻朱宏昭張虔釗切于立功促攻賊壘晏球不得已而進兵  
遂致傷痍者眾乙卯以太子少保李茂勳卒輟朝己未詔弛麴禁  
許民間自造于秋苗上徵納麴價畝出五錢時孔循以麴法殺一  
家于洛陽或獻此議以爲愛其人便于國故行之宗正卿李紆除  
名刑部侍郎馬縞貶綏州司馬刑部員外郎李慎儀貶階州司戶  
初李紆差攝陵臺令張保嗣等各虛稱試銜爲奉先令王延朗所  
訟大理寺斷以詐假官論刑部詳覆稱非詐假大理執之召兩司  
廷議刑部理屈故有是貶紆續勅配隴州徒一年未幾詔曰天下

府州例是攝官皆結試銜或因勘窮便關詐假已前或有稱試銜

一切不問此後並宜禁止曹州刺史成景宏貶綏州司戶參軍續

勅長流宥州尋賜自盡坐受本州倉吏錢百緡也壬戌齊州防禦

使曹廷隱以奏舉失實配流永州續勅賜自盡甲子王晏球奏今

月十九日契丹七千騎來援定州王師逆戰于唐河北破之追

至滿城又破之斬二千級獲馬千匹戊辰詔福建節度使王延鈞

依前檢校太師守中書令進封閩王己巳王晏球奏此月二十一

日追契丹至易州掩殺四十里擒獲甚眾故朔方節度使韓洙贈

太尉以兵部侍郎王權御史中丞梁文矩並爲吏部侍郎以左諫

議大夫呂夢奇爲御史中丞八月癸酉朔以翰林學士守中書舍

人李懌劉昫並爲戶部侍郎充職以吏部侍郎劉岳守祕書監以

吏部侍郎韓彥惲守禮部尚書以戶部侍郎韓藹守太子賓客以

自齊州刺史改爲史作已未較書是  
臨南齊史果曰

州本  
府作



嘉丁 舊作協 改正

本國下 孝道 德 八月 壬戌 趙德 鈞 趙 擊 契丹 據 薛 史 八月 任 侯 酉 刊 不 得 有 壬 戌 疑 通 德 後

戶部侍郎裴暉守兵部侍郎以中書舍人張文寶守刑部侍郎詔凡有姓犯廟諱者以本望為姓丁丑以檢校尚書右僕射守龍武大將軍劉訓為晉州節度使檢校太傅壬午幽州趙德鈞奏于府西邀殺契丹敗黨數千人擒首領特哩衣及其屬凡五十餘人是時官軍襲殺契丹屬秋雨繼降泥濘莫進人饑馬乏散投村落所在村民持白挺毆殺之德鈞出兵接于要路惟奇峯嶺北有馬潛遁脫者數十餘無噍類帝致書諭其本國辛卯以朔方軍留後韓璞為朔方軍節度使靈武雄警甘肅等州觀察使檢校司徒帝聞隨鄧復郢均房之民父母骨肉有疾以長竿遙致粥食而餉之出嫁女夫家不遣來省疾乃下詔委長吏嚴加禁察房州奏新開山路四百里南通夔州畫圖以獻以前洋州節度使戴思遠為太子太保致仕庚子詔今後翰林學士入院以先後為班次承旨一

本國下 孝道 德 八月 壬戌 趙德 鈞 趙 擊 契丹 據 薛 史 八月 任 侯 酉 刊 不 得 有 壬 戌 疑 通 德 後

本國下 孝道 德 八月 壬戌 趙德 鈞 趙 擊 契丹 據 薛 史 八月 任 侯 酉 刊 不 得 有 壬 戌 疑 通 德 後

本國下 孝道 德 八月 壬戌 趙德 鈞 趙 擊 契丹 據 薛 史 八月 任 侯 酉 刊 不 得 有 壬 戌 疑 通 德 後

員不計官資先後在學士之上閏月丁未兩浙節度觀察留後清海軍節度使檢校太師兼中書令錢元瓘加杭州越州大都督府長史充鎮東鎮海等軍節度使戊申趙德鈞獻戎俘于闕下其蕃將特哩衣等五十人留于親衛餘契丹六百人皆斬之乙卯升楚州為順化軍以明州刺史錢元珣為本州節度使以吏部尚書蕭頊為太子少保契丹遣使來貢獻契丹平州刺史張希崇上表歸順乙丑陝州節度使李從敏移鎮滄州以宣徽南院使張延朗為陝州節度使詔在京遇行極法日宜不舉樂兼減常膳諸州遇行極法日禁聲樂己巳滑州掌書記孟昇匿母服大理寺斷處流特勅孟昇賜自盡觀察使觀察判官錄事參軍失其糾察各行殿罰襄邑縣民間威父為人所殺不雪父冤有狀和解特勅處死是月二十七大水河水溢絳州地震九月乙亥以捧聖左右廂副都指



揮使索自通爲雲州節度使丁丑以太府卿判四方館事李郁爲  
宗正卿壬午以晉州節度使安崇阮爲左驍衛上將軍甲申吐蕃  
回鶻各遣使貢獻壬辰宰臣王建立進玉盃上有文曰傳國萬歲  
孫乙未詔德州流人溫韜遼州流人段凝嵐州司戶陶玘憲州司  
戶石知訥原州司馬聶嶼竝宜賜死于本處暴其宿惡而誅之也  
丙申以邠州節度使梁漢瓌爲右威衛上將軍丁酉河陽節度使  
駙馬都尉趙延壽爲檢校司徒己亥詔徐州節度使房知溫兼荆  
南行營招討使知荆南行府事冬十月甲辰制瓊華長公主孟氏  
可冊爲福慶長公主丙午以滄州節度使李從敏兼北面招討使  
戊申帝臨軒命禮部尙書韓彥暉工部侍郎任贊往應州奉冊四  
廟詔汾州節度使李敬周攻慶州以刺史竇廷琬拒命故也戊午  
契丹平州刺史張希崇已下八十餘人見于充德殿頒賜有差突

故也下 案案延疏及通鑑作  
史作十月 政見史繫于十月以前與  
薛史異

朝貢下 案張若虛 案州 政見  
史作丁丑

中下 案若虛 案通鑑作十二  
月丙辰詳見通鑑考異

厥首領張慕進等來朝貢甲子安州節度使高行珪奏屯駐左神  
捷左懷順軍士作亂已逐殺出城詔升壽州爲忠正軍戊辰以雲  
州節度使索自通領壽州節度使以前雲州節度使張溫復爲雲  
州節度使庚午夜西南有彗星長丈餘在牛星五度十一月癸酉  
日南至帝御崇元殿受朝賀甲戌捧聖指揮使何福進招收到安  
州作亂兵士五百人自指揮使已下至節級四十餘人竝斬餘眾  
釋之壬午房知溫奏荆南高季興卒中書舍人劉贊奏請節度使  
及文班二品已上謝見通喚從之是日以契丹所署平州刺史光  
祿大夫檢校太保張希崇爲汝州刺史加檢校太傅己丑中書奏  
今後或有封冊請御正衙從之青州奏節度使霍彥威卒輟朝三  
日詔宰臣王建立權知青州軍州事庚寅禮部員外郎和凝奏應  
補齋郎竝須引驗正身以防偽濫舊例使陰一任官補一人今後



改官須轉品即可如無子許以親姪繼限念書十卷試可則補從之甲午以尙書左僕射同平章事集賢殿大學士判三司王建立為青州節度使檢校太尉同平章事丙申帝謂侍臣曰古鐵券如何趙鳳對曰帝王誓文許其子子孫孫長享爵祿帝曰先朝所賜惟朕與郭崇韜李繼麟三人爾崇韜繼麟尋已族滅朕之危疑慮在旦夕于是嗟歎久之趙鳳曰帝王執信故不必銘金鏤石矣吏部郎中何澤奏流外官請不試書判之類從之吐蕃遣使朝貢戊戌前安州節度副使范延榮並男皆斬于軍巡獄為高行珪誣奏故也十二月壬寅朔詔真定府屬縣宜準河中鳳翔例升為次畿真定縣升為次赤甲辰邠州節度使李敬周奏收下慶州刺史竇廷琬族誅

永泰大興卷七十一百八十四

舊五代史卷三十九

初七日

舊五代史卷三十九攷證

唐明宗紀五契丹陷平州

案契丹陷平州歐陽史作丁巳通鑑

不書日攷平州自梁開平中劉守光以賂契丹天成元年盧文

進舉其地以歸于唐至三年復為遼人所取自是平州遂屬于

遼宋人論石晉賂遼故地兼及平州蓋未詳攷今附識于此

為左驍衛上將軍

案通鑑作左衛上將軍歐陽史從是書作左

驍衛

己亥回鶻可汗仁諭遣都督李阿爾珊等貢獻

案李阿爾珊來

貢歐陽史作戊戌

北面副招討宋州節度使王晏球以定州節度使王都反狀聞

案遼史王都以定州來歸作三月事五代春秋及通鑑並從是

書作四月



王戌齊州防禦使曹廷隱以奏舉失實配流永州續勅賜自盡  
案歐陽史作己未殺齊州防禦使曹廷隱己未在三戌前三日  
不應發配在後賜死轉在前也歐陽史疑訛

壬午幽州趙德鈞奏于府西邀殺契丹 案通鑑作八月壬戌趙

德鈞邀擊契丹據是書八月係癸酉朔不得有壬戌疑通鑑誤

邠州節度使李敬周 李敬周通鑑作李敬通是書前後並作敬

周歐陽史亦作敬周疑通鑑傳刻之訛

以刺史竇廷琬拒命故也 案竇廷琬反通鑑從是書作十月歐

陽史繫于十月以前與是書異

突厥首領張慕進等來朝貢 慕進歐陽史作慕晉

壬午房知溫奏荆南高季興卒 案高季興卒通鑑作十二月丙

辰詳見通鑑攷異

檢校太保張希崇為汝州刺史 案歐陽史作汝州防禦使通鑑

從是書作刺史

托諾巴摩哩舊作禿泐悲梅老今改 伊埒雅遜舊作野利延孫

今改 阿爾珊舊作阿□今改 託諾舊作禿餒今改 特里

衰舊作惕隱今改

舊五代史卷三十九攷證



舊五代史卷四十

唐書第十六

明宗紀六

宋薛居正等撰

天成四年春正月壬申朔帝御崇元殿受朝賀仗衛如儀幽州節度使趙德鈞奏臣孫贊年五歲默念論語孝經舉童子于汴州取解就試詔曰都尉之子太尉之孫能念儒書備彰家訓不勞就試特與成名宜賜別勅及第附今年春榜戊子放元年應欠秋稅以左衛上將軍安崇阮為黔南節度使壬辰回鶻入朝使徹伯爾等五人各授懷化司戈放還以北京副留守馮贇為宣徽使判三司戊戌禁天下虛稱試攝銜西川孟知祥奏支屬刺史乞臣本道自署二月乙巳王晏球奏此月三日收復定州獲王都首級生擒契

二字據  
仍本改



塔內下舊作光鏡今改正  
新契下李歐陽史作二月癸卯王  
是誤充字州而詳史今通鑑作  
癸丑考癸丑非二月三月疑傳寫之誤

丹託諾等二千餘人百寮稱賀已畢乃詔取今月二十四日車駕  
還東京辛亥以北面行營招討使宋州節度使王晏球為鄆州節  
度使加兼侍中以北面行營副招討使滄州節度使李從敏為定  
州節度使以北面行營兵馬都監鄆州防禦使張虔釗為滄州節  
度使幽州節度使趙德鈞加兼侍中乙卯以樞密使趙敬怡權知  
汴州軍州事丙辰邢州奏定州俘馘百官就列宣露布于樓前禮畢以王  
西帝御咸安樓受定州俘馘百官就列宣露布于樓前禮畢以王  
都首級獻于太社王都男四人第一人託諾父子二人竝磔于市  
五代會要尚書兵部宣露布于樓前宣訖尚書刑部侍郎張文寶奏曰逆賊王都首級請付所司大理卿蕭希甫受之以出獻于郊祀其王都男并蕃將等磔于開封橋時露布  
之文類制勅之體蓋執筆者誤頗為識者所嗤樞密使趙敬怡卒  
贈太傅以端明殿學士趙鳳權知汴州軍州事甲子車駕發汴州  
丙寅至鄭州賜左僕射致仕鄭珪錢二十萬丁卯宰相崔協卒詔

塔內舊作  
本改字已  
辛二六

二字據所  
本改字同

贈尚書左僕射東都留守太子少傅李琪等奏至偃師縣奉迎時  
琪奏章中有敗契丹之凶黨破真定之逆城之言詔曰契丹即為  
凶黨真定不是逆城李琪罰一月俸庚午車駕至自汴州三月甲  
戌馮道進表乞命相丙戌詔皇城使李從璨貶授房州司戶參軍  
仍令盡命從璨帝之諸子也先是帝巡幸汴州畱從璨以警大內  
從璨因遊會節園酒酣戲登御榻安重誨奏之故置于法焉壬辰  
中書奏今後羣臣內有乞假觀省者請量賜茶藥從之乙未以前  
鄆州節度使符習為汴州節度使丙申詔鄴都幽鎮滄邢易定等  
州管內百姓除正稅外放免諸色差配以討王都之役有輓運之  
勞也夏四月庚子朔禁鐵鐵錢壬寅重修廣壽殿成有司請以丹  
漆金碧飾之帝曰此殿經焚不可不修但務宏壯不勞華侈湖南  
奏敗荆南賊軍于石首鎮詔沿邊置場買馬不許蕃部直至闕下



美後下舊作捺括梅里今改

先是党項諸蕃凡將到馬無驚良竝云上進國家雖約其價以給之及計其館穀錫資所費不可勝紀計司以為耗蠹中華遂止之壬子以皇子北都畱守河陽節度使從榮為河南尹判六軍諸衛事以皇子河南尹判六軍諸衛事從厚為北京畱守以河陽節度使趙延壽為宋州節度使以侍衛親軍都指揮使鎮南軍節度使康義誠為河陽節度使契丹寇雲州癸丑契丹遣紐赫美稜等復率其屬來朝貢稱取托諾等骸骨並斬于北市甲寅以端明殿學士趙鳳為門下侍郎兼工部尚書平章事丙辰諫議大夫致仕襲文宣公孔邈卒庚申以王建立孔循帶中書直省吏歸藩竝追迴壬戌幽州節度使趙德鈞兼北面行營招討使鎮州節度使范延光加檢校太傅戊辰中書奏五月一日應在京九品已上官及諸道進奉使請準貞元七年勅就位起居永為恒式從之五月己巳

從之下世居唐書哀帝化云中書奏少帝行事不合稱宗今考五代會要天成二年特立子嗣在夫會議引君不踰年不入宗廟之說此別立子嗣後及不稱宗係非議其行事也舊唐書錄

朔帝御文明殿受朝丙子以夔州節度使西方鄴卒輟朝丁丑大理卿李保殷卒己卯以忠武軍節度使索自通為京兆尹充西京畱守以左威衛上將軍朱漢賓為潞州節度使乙酉以黔州節度使安崇阮為夔州節度使以左驍衛上將軍張溫為洋州節度使以黔州畱後楊漢賓為本州節度使中書奏太常寺定少帝諡昭宣光烈孝皇帝廟號景宗伏以少帝今不入廟難以言宗只云昭度使以新州威塞軍畱後翟璋為威塞軍節度使壬辰以權知尚書右丞崔居儉為尚書右丞詔葺天下廡宇丙辰襄州奏荆南高從誨乞歸順雲州奏契丹犯塞六月辛丑以左散騎常侍姚顛為兵部侍郎壬寅夔州節度使楊漢章移鎮雲州以北京馬步軍都指揮使兼欽州刺史張敬達為鳳州節度使癸卯以前西京畱



賤罪不尋通鑑唐中房後海日梅  
前利南行軍司馬歸州刺史史志  
求內甘薛史作內辰與通鑑果

守事張遵誨行衛尉事充客省使國子博士田敏請葺四郊祠祭  
齋室丙午以沂州刺史張萬進為安北都護充振武軍節度使戊  
申以宿州團練使康思立為利州節度使登州刺史孫元停任坐  
在任無名科率故也詔鄴都仍舊為魏府應魏府汴州益州宮殿  
悉去鴟尾賜節度使為衙署辛亥以權知朔方軍留後定難軍都  
知兵馬使韓澄為朔方留後癸丑以前潞州節度使符彥超為左  
驍衛上將軍詔諸道節度使行軍司馬名位雖高或帥臣不在其  
州事宜委節度副使權知又詔藩郡所請賓幕及主事親從者悉  
以名聞丙辰權知荆南軍府事高從誨上章首罪乞修職貢仍進  
銀三千兩贖罪壬戌幸至德宮詔京城空地課人蓋造如無力者  
許人請射營構秋七月庚午以前西京留守判官張鏞為司農卿  
壬申貶前左金吾上將軍毛璋為儒州長流百姓尋賜自盡以其

在藩鎮陰蓄奸謀故也甲戌御史中丞呂夢奇責授太子右贊善  
大夫坐曾借毛璋馬故也己卯以工部侍郎任贊為左散騎常侍  
以樞密直學士左諫議大夫充匭使閭至為工部侍郎充職遂州  
進嘉禾一莖九穗壬午以給事中判大理卿事許光義為御史中  
丞史館上言所編修莊宗一朝事迹欲名為實錄太祖獻祖懿祖  
名為紀年錄從之五代會要天成三年十二月史館奏據左補闕張紹遠狀嘗讀國書伏

力國朝太祖武皇帝自咸通後來勤王戮力翦平多難頌立大功三換節旄再安京國莊宗皇帝  
終平大憝奄有中原備關編修遂成湮墜伏請與當館修撰參序條綱撰太祖莊宗實錄四年七  
月監修國史趙鳳奏奉勅修懿祖獻祖太祖莊宗四帝實錄自今年六月一日起手旋具進呈伏  
以凡關纂述務合品題承乾御宇之君行事方云實錄追尊冊號之帝約文祇可紀年所修前件  
史書今欲自莊宗一朝名為實錄其太祖以上竝目為紀年錄從之甲申以前荆南行軍司馬檢校太傅高從

誨起復授檢校太傅兼侍中充荆南節度使丙戌涇州節度使李  
從昶移鎮華州以冀州刺史李金全為涇州節度使戊子中書奏  
今後新及第舉人有曾授正官及御署者欲約前任資序與除一

若伏見前代史館歸于著作國和分  
撰五代史方委大目監修自天曆後未始  
夫面負脩撰當時是任時取良材一代  
之書便成于手其後流坑夫備波蕩  
不意冒修撰之名昌揚褒貶之職  
及乎海修大典即云別訪通才况當館  
職在修脩合行撰述初宜依  
考當時史館修撰名實又如此薛史列  
武皇于本紀誠者識之歐陽史世改在  
宗紀

本紀



官從之壬辰詔取來年二月二十一日有事于南郊八月丁酉朔大理正路阮奏切見春秋釋奠于文宣王而武成王廟久曠時祭請復常祀從之戊戌中書奏太子少傅李琪所撰進霍彥威神道碑文不分真偽是混功名望令改撰從之琪梁之故相私懷感遇敘彥威在梁歷任不欲言偽梁故也辛丑詔亂離已來天下諸軍所掠生口有主識認卽勒還之以前清河縣令龔鄴國公食邑三千戶楊仁矩爲祕書丞御史臺奏主簿朱穎是前中丞奏請合隨聽罷任詔曰主簿旣爲正秩況入選門顯自朝恩合終考限宜令仍舊守官甲辰以宰臣馮道爲南郊大禮使兵部尙書盧質爲禮儀使御史中丞許光義爲儀仗使兵部侍郎姚顛爲鹵簿使河南尹從榮爲橋道頓遞使客省使衛尉卿張遵誨爲修裝法物使乙巳黑水朝貢使郭濟等率屬來朝授歸德司戈放還蕃丁未以翰

翰本傳  
至年等  
屬三

林學士承旨禮部侍郎知制誥李愚爲兵部侍郎職如故以中書舍人盧詹爲禮部侍郎以兵部侍郎裴暉爲太子賓客吐渾首領念公山來朝貢戊申帝服袞冕御文明殿追册昭宣光烈孝皇帝庚戌以宰臣監修國史趙鳳兼判集賢院事以左散騎常侍任贊判大理卿事己未高麗王建遣使貢方物辛酉詔準往例節度使帶平章事侍中中書令竝列銜于勅牒側書使字今錢鏐是元帥尙父與使相名殊馬殷守太師尙書令是南省官資不合署勅尾今後勅牒內竝落下乙卯党項首領朝貢甲子幸金真觀改賜建法大師賜紫尼智願爲圓惠大師卽武皇夫人陳氏也丙寅達鞠來朝貢京城內有南州北州乃張全義光啓中所築至是詔許人依街巷請射城濠任使平填蓋造屋宇九月丁卯中書奏據宗正寺申懿祖永興陵獻祖長寧陵太祖建極陵竝在代州鴈門縣



皇帝追尊四廟在應州金城縣詔應州升為望州金城鴈門並升為望縣辛未太常博士段彥奏切見大祠則差宰相行事中祠則卿監行事小祠則委太祝奉禮並不差官今後請差五品官行事從之癸巳制天下兵馬元帥尙父吳越國王錢鏐可落元帥尙父吳越國王授太師致仕責無禮也先是上將軍烏昭遇使于兩浙以朝廷事私于吳人仍目鏐為殿下自稱臣謁鏐行拜蹈之禮及迴使副劉致俱述其事故停削鏐官爵令致仕烏昭遇下御史臺尋賜自盡後有自浙中使還者言昭遇無臣鏐之事為致所誣人頗以為冤乙未詔諸道通勘兩浙綱運進奉使並下巡獄冬十月丙申朔併吏部三銓為一銓宜令本司官員同商量注擬連署申奏仍不得于私第注官戊戌以襄州兵馬都監守磁州刺史康福為朔方河西等節度使靈威雄警涼等州觀察使時朔方將吏請

鈔本具  
案劉具

帥于朝廷故命康福往鎮之庚子以右金吾上將軍史敬鎔為左金吾上將軍以左驍衛上將軍符彥超為右金吾上將軍以前黔州節度使李承約為右驍衛上將軍以雲州節度使張敬詢為左驍衛上將軍以前華州節度使王景戡為右驍衛上將軍癸卯太常少卿蕭愿責授太子洗馬奪緋愿南郊行事與祠官同飲詰且猶醉不能行禮為御史所劾也詔新授朔方節度使康福將兵萬人赴鎮己酉制復故荆南節度使高季興官爵辛亥升閬州為保寧軍壬子以內客省使左衛大將軍李仁矩為閬州節度使幸七星亭丙辰夏州進白鷹重誨奏曰夏州違詔進貢臣已止約帝曰善朝退帝密令左右進焉是日幸龍門十一月丁卯洛州水暴漲壞居人垣舍戊辰以刑部侍郎張文寶為右散騎常侍己巳以尙書右丞李光序為刑部侍郎癸酉升曹州濟陰縣為次赤以昭宣

鈔本具  
康福



光烈孝皇帝溫陵所在故也甲戌奉國軍節度使王延稟加兼侍  
中從福建節度使王延鈞請也車駕出近郊試夏州所進白鷹戒  
左右勿令重誨知己卯日南至帝御文明殿受朝賀癸未祕書少  
監于嶠配振武長流百姓永不齒任爲宰臣趙鳳誣奏也史官張  
昭遠等以新修獻祖懿祖太祖紀年錄共二十卷莊宗實錄三十  
卷上之賜器帛有差五代會要監修趙鳳撰張昭遠呂咸休各賜綵銀器等十二月丁酉靈武康福  
奏破野利大蟲兩族二百餘帳于方渠獲牛羊三萬戊戌詔應授  
官及封贈官誥舉人冬集等所費用物一切官破壬戌中書奏今  
後宰臣致齋內不押班不知印不赴內殿起居或遇國忌行事官  
已受誓戒宜不赴行香并不奏刑殺公事大祠致齋內請不開宴  
每遇大忌前一日請不坐朝從之永樂大典卷七千二百五

舊五代史卷四十

初二日史

舊五代史卷四十攷證

唐明宗紀六贊年五歲默念論語孝經 案宋史作贊七歲誦書  
二十七卷

宜賜別勅及第附今年春榜 案宋史云特賜童子及第附長興  
三年禮部春榜是書作天成四年春榜與宋史異

二月乙巳王晏球奏此月三日收復定州 案歐陽史作二月癸  
卯王晏球克定州與是書合通鑑作癸丑攷癸丑非二月三日  
也疑傳寫之誤

禁鐵鑼錢 鐵鑼錢通鑑作鐵錫錢攷胡三省注云馬殷得湖南  
鑄錫爲錢本用之境内其後遂流入中國疑原本鑼字誤攷冊

府元龜亦作鐵鑼錢今仍其舊

以端明殿學士趙鳳爲門下侍郎兼工部尙書平章事 案歐陽



史本紀作端明殿學士尙書兵部侍郎趙鳳爲門下侍郎兼工部尙書同平章事趙鳳傳作禮部侍郎與本紀異見吳縝纂誤伏以少帝今不入廟難以言宗案舊唐書哀帝紀云中書奏少帝行事不合稱宗攷五代會要天成二年博士呂明龜議引君不逾年不入宗廟之禮請別立廟于園陵故不稱景宗非議其行事有失也舊唐書誤

丙辰權知荆南府事高從誨上章首罪丙辰通鑑作庚申

使副劉玫劉玫通鑑作韓玫

徹伯爾舊作掣撥今改托諾舊作禿餒今改紐赫美稜舊作

捺括梅里今改郭濟舊作骨至今改

舊五代史卷四十攷證

舊五代史卷四十一

宋薛居正等撰

唐書第十七

明宗紀七

長興元年春正月丙寅朔帝御明堂殿受朝賀仗衛如常儀乙亥國子監請以監學生束脩及光學錢備監中修葺公用從之丙子帝謂宰臣曰時雪未降如何馮道曰陛下恭行儉德憂及烝民上合天心必有春澤是夜降雪其夕右散騎常侍蕭希甫封狀申樞密稱得河堰衙官狀告本都將校二十餘人欲謀不軌至旦追問無狀斬所告人是日幸至德宮辛卯中書奏郊天有日合差大內畱守詔以宣徽南院使朱宏昭充二月戊戌幸稻田莊己亥黑水國主兀兒遣使貢方物翰林學士劉昫奏新學士入院舊試五題



請今後停試詩賦祇試麻制答蕃書批答共三道仍請內賜題目

定字數付本院詔試從之五代會要載劉昫原奏云舊例學士入院除中書舍人外

五題並于當日呈納從前每遇各試多預出五題潛令宿構其無黨援者即有司奏皇帝

致齋于明堂按舊服通天冠絳紗袍文武五品已上著袴褶近例

祇著朝服從之乙巳中書奏皇帝朝獻太微宮太廟祭天地于圜

丘準禮例親王為亞獻行事受誓戒從之以天雄軍節度使石敬

瑋為御營使壬子帝宿齋于明堂殿癸丑朝獻太微宮是日宿齋

于太廟詰旦請行饗禮甲寅赴南郊齋宮是夜微雨三鼓後晴明

如晝乙卯祀昊天上帝于圜丘柴燎禮畢郊宮受賀是日御五鳳

樓宣制改天成五年為長興元年大赦天下除十惡五逆放火劫

舍屠牛官典犯賊偽行印信合造毒藥外罪無輕重咸赦除之天

成四年終諸道所欠殘稅及場院欠折並特放免羣臣職位帶平

章事侍中中書令並與改鄉名里號朝臣及蕃臣郡守亡父母及

父母在并妻室未沾恩命者並與恩澤應私債出利已經倍者祇

許徵本已經兩倍者本利並放河陽管內人戶每畝舊徵橋道錢

五文今後不徵諸道州府每畝先徵麩錢五文今特放二文云商

州吏民以刺史郭知瓊善政聞詔褒之三月丁卯幸會節園遂幸

河南府靈武奏殺戮蕃賊二千人壬申鳳翔節度使李從曠進封

岐國公移鎮汴州甲戌延州節度使高允韜移鎮邢州丙子以宣

徽使朱宏昭為鳳翔節度使潞州節度使朱漢賓加檢校太傅移

鎮晉州徐州節度使房知溫移鎮鄆州鄆州節度使王晏球移鎮

青州宰臣馮道率百寮拜表請上尊號曰聖明神武文德恭孝皇

帝詔報不允壬午許州節度使孔循移鎮滄州陝州節度使張延

朗移鎮許州加檢校太傅滄州節度使張虔釗移鎮徐州加檢校



太保癸未詔貶右散騎常侍集賢殿學士判院事蕭希甫為嵐州  
司戶參軍仍馳驛發遣坐誣告之罪也宰臣馮道等再請上尊號  
詔允之丙戌以侍衛親軍馬步軍都指揮使河陽節度使康義誠  
為襄州節度使檢校太傅以左武衛上將軍劉彥琮為陝州節度  
使檢校太傅庚寅制淑妃曹氏可立為皇后仍令擇日冊命夏四  
月甲午朔國子司業張溥奏請復八館以廣生徒按六典監有六  
學國子太學四門律學書學算學是也而溥云八館謬矣丁酉前  
汴州節度使檢校太尉兼侍中符習加太子太師致仕進封衛國  
公戊戌遂州節度使夏魯奇加同平章事皇子河中節度使從珂  
進位檢校太尉封開國公自是諸道節鎮皆次第加恩以郊禋覃  
慶澤故也己亥幸會節園壬寅以樞密使安重誨為留守太尉兼  
中書令使如故青州節度使王建立加侍中移鎮潞州皇子河中

節度使從珂奏臣今月五日閱馬于黃龍莊衙內指揮使楊彥溫

據城叛臣尋時詰問稱奉宣命胡三省通鑑注云樞密院用宜三省用堂帖臣見在虞鄉縣帝

遣西京畱守索自通侍衛步軍都指揮使藥彥稠等攻之仍授彥

溫絳州刺史冀誘而擒之也詔從珂赴闕丁未以戶部尚書李鏘

為兗州行軍司馬坐引淮南覘人貽安重誨寶帶也戊申宰臣馮

道加右僕射趙鳳加吏部尚書乙酉以左龍武統軍劉君鐸卒廢

朝癸丑索自通藥彥稠等奏收復河中斬楊彥溫傳首來獻初彥

稠出師帝戒之曰與朕生致彥溫吾將自訊之及收城斬首傳送

帝怒彥稠等時議皆以為安重誨方弄國權從榮諸王敬事不暇

獨忌從珂威名每于帝前屢言其短巧作窺圖冀能傾陷彥溫既

誅從珂歸清化里第重誨謂馮道等曰蒲帥失守責帥之義法當

未敢也 崇寧日通一考 叔揚 臣

五代史 卷一百一十一 本紀



所以激勵藩守帝曰皆非公等意也後數日帝于中興殿見宰臣趙鳳承重誨意又再論列帝默然翼日重誨復自論奏帝極言以拒之語在末帝紀中帝又曰卿欲如何制置重誨曰于陛下父子之間臣不合言一稟聖旨帝曰從他私第閒坐何煩奏也乃止以前邢州節度使檢校司徒李從溫爲左武衛上將軍丙辰以西京畱守檢校司徒索自通爲河中節度使丁巳雲州奏掩襲契丹獲頭口萬計戊午帝御文明殿受冊徽號冊曰維長興元年歲次庚寅四月甲午朔二十五日戊午金紫光祿大夫守尙書左僕射兼門下侍郎同中書門下平章事充太微宮使宏文館大學士上柱國始平郡開國侯食邑一千五百戶食實封一百戶臣馮道銀青光祿大夫門下侍郎兼吏部尙書同中書門下平章事監修國史判集賢院事上柱國天水郡開國伯食邑七百戶臣趙鳳及文武

百官特進太子少傅上柱國酒泉郡開國侯食邑一千戶臣李琪等五千八百九十七人言臣聞天不稱高而體尊地不矜厚而形大厚無不載高無不覆四時行乎內萬物生其間總神祇之靈叶帝王之運日出而星辰自戢龍飛而雷雨皆行元氣和而天下和庶事正而天下正伏惟皇帝陛下天授一德時歷多艱翊太祖以興邦佐天皇而定難拯嗣昭于潞困救德威于燕危遏思遠而全鄴都誅彥章而下梁苑成再造之業由四征之功洎纂鴻圖每敷皇化去內庫而省庖膳出宮人而減伶官輕寶玉之珍卻鷹鷂之貢滔風旣洽嘉瑞自臻故登極之前人皆不足改元之後時便有年遐荒旋斃于戎王重譯徑來于蠻子東巡而守殷墟北討而王都殲破契丹而燕趙無虞控靈武而瓜沙並復近以饗上元而薦太廟就吉土而配昊天輅已降而雨露事欲行而月見燔柴禮畢



作解恩尊帝命咸均人情普悅非陛下有道有德至聖至明動不  
疑人靜惟恭已常敦孝禮每納忠言則何以臨御五年澄清四海  
時久纏于災害民驟見于和平休徵備載于簡編徽號過持于謙  
讓三年不允眾志皆堅天不以上帝自崇日不以大明自貴于烝  
民有惠于元后同符列聖皆然舊章斯在今以明庭百辟列士諸  
侯中外同辭再三瀝懇臣等不勝大願謹奉玉寶玉冊上號曰聖  
明神武文德恭孝皇帝伏惟皇帝陛下體堯舜之至道法日月于  
太虛威于夷狄恩及蟲魚奉國者繼加榮寵違天者咸就誅鋤典  
禮當告成之後夙夜思卽位之初千秋萬歲永混車書宰臣馮道  
之辭也庚申以左金吾上將軍史敬鎔爲鄧州節度使以右金吾  
上將軍符彥超爲兗州節度使以驍衛上將軍張敬詢爲滑州節  
度使以閩州防禦使孫岳爲鳳州節度使詔改鳳翔管内應州爲

匡州信州爲晏州改新州管内武州爲毅州五月乙巳鄭州防禦  
使張進副使咸繼威並停任以盜掠城中居人故也丙寅以少府  
監韋肅爲洛州刺史以潞州節度使王建立爲太傅致仕建立素  
與安重誨不協因其入朝乃言建立自鎮歸朝過鄴都日有扇搖  
之言以是罪之故令致仕丁卯以前興元節度使劉仲殷權知潞  
州軍州事戊辰以安州節度使高行珪卒輟朝有司上言皇后受  
冊內外命婦並合奉賀今未有命婦準例上表稱賀中書諸道節  
度使但進表上言皇帝外命婦上皇后賀賤表進呈詔無報應皇  
親或有慶賀及起居章表內中進呈後祇宣示來使並不合答復  
從之壬申以權知昭義軍軍州事劉仲殷爲潞州節度使檢校太  
傅丁丑帝臨軒命使冊淑妃曹氏爲皇后禮院上言百官上疏于  
皇后曰皇后殿下及六宮及率土婦人慶賀祇呼殿下不言皇后



中書覆奏若祇呼殿下恐與皇太子無所分別凡上中宮表章呼  
皇后殿下若不形文字尋常祇呼皇后從之癸未太子少傅蕭頊  
卒廢朝甲申回鶻可汗仁喻遣使貢方物辛卯以翰林承旨兵部  
侍郎李愚爲太常卿壬辰以前滑州節度使李從璋爲右驍衛上  
將軍六月丁酉以護駕馬軍都指揮使貴州刺史安從進爲宣州  
節度使充護駕馬軍都指揮使以護駕步軍都指揮使澄州刺史  
藥彥稠爲壽州節度使兼護駕步軍都指揮使甲辰以皇城使安  
崇緒爲河陽畱後重誨子也鳳翔奏所管良晏匡三州並無屬縣  
請卻改爲縣從之仍舊爲軍鎮前振武節度使安金全卒壬子中  
書門下奏詳覆到禮部送今年及第進士李飛樊吉夏侯瑛吳洵  
王德柔李穀等六人望放及第其盧價等七人及賓貢鄭朴望許  
令將來就試知貢舉張文寶試士不得精賞望罰一季俸從之丁

巳皇子北京畱守河東節度使從厚移領鎮州以左武衛上將軍  
李從溫爲許州節度使秋七月甲子以宣徽南院使行右衛上將  
軍判三司馮贇爲北京畱守太原尹己巳以鄧州節度使史敬鎔  
卒廢朝甲戌以左威衛上將軍梁漢鵬爲鄧州節度使前兗州節  
度使趙在禮爲左驍衛上將軍庚辰奉國軍節度使兼威武軍節  
度副使檢校太尉兼侍中王延稟加兼中書令詔諸州得替防禦  
團練使刺史並宜于班行比擬如未有員闕可隨常參官逐日立  
班新例也辛巳詔揀年少官人及西川宮人並還其家無家可歸  
者任從所適甲申以前齊州防禦使孫璋爲鄆州節度使戊子以  
右散騎常侍陸崇卒廢朝崇爲福建冊使卒于明州贈兵部尙書  
宿州進白菟安重誨謂其使曰豐年爲上瑞免懷狡性雖白何爲  
命退歸八月甲午以前鄧州節度使盧文進爲左衛上將軍北京



奏吐渾千餘帳內附于天池川安置禁在京百司影射州縣稅戶  
 乙未捧聖軍使李行德十將張儉告密人邊彥溫並族誅以其誣  
 告安重誨私市兵仗故也以前許州節度使張延朗為檢校太傅  
 行兵部尙書充三司使三司之有使額自延朗始也初中書覆奏  
 授延朗諸道鹽鐵轉運等使兼判戶部度支事奏入宣旨曰會計  
 之司國朝重事將總成其事額俾專委于近臣貴便一時何循往  
 例兼移內職可示新規張延朗可充三司使班在宣徽使下癸卯  
 北京奏生吐渾內附欲于嵐州安族帳都官員外郎知制誥張昭  
 遠奏請依國朝舊例選郎官御史分行天下宣問風俗興利除害  
 不報壬寅皇子河中尹判六軍諸衛事從榮封秦王仍令所司擇  
 日冊命五代會要長興元年九月太常禮院奏草定秦王儀注博士段承議曰據開元禮臨軒冊禮命諸王大臣其曰受冊者朝服從第函簿與百官俱集朝堂就次受冊訖通事舍人引不載謁朝還第之儀自開元以後冊拜諸王皆正衙命使詣延英進冊皇帝御殿高品引王入立于位高品宣制讀冊王受冊訖歸院亦無乘輅謁朝之禮臣按五禮精義云古者皆

仍本南 仍本南

因禘嘗而頒爵祿所以示無自專稟之于祖宗也今雖冊命不在丞嘗然拜大官封大邑必至殿  
 廷敬慎之道也今當司欲準開元禮其日秦王服朝服自理所乘輅車備函簿與羣臣俱集朝堂  
 就次受冊訖至應天門外奉冊置于載冊之車秦王升輅出謁太廟訖歸理所儀仗函簿如來時之儀從之

揮使王傳極殺本州刺史陳宣焚燒州城以所部兵士及家口五  
 千人歸國至沂州帝遣使慰納之庚戌正衙命使冊福慶長公主

仍本極 仍本極

孟氏以前雄武軍節度使王思同為左武衛上將軍以前鳳州節  
 度使陳臯為右威衛上將軍壬子正衙命使赴太原冊永寧公主

石氏乙卯以左監門衛上將軍陳延福卒廢朝丙辰皇子鎮州節  
 度使從厚封宋王仍令擇日冊命九月乙丑階州刺史王宏贄上

言一州主客戶纔及千戶並無縣局臣今檢括得新舊主客已及  
 三千二百欲依舊額立將利福津二縣請置令佐從之丁丑詔天

仍本數

下諸州府不得奏薦著紫衣官員為州縣官戊寅升尚書右丞為  
 正四品癸未利閩遂三州奏東川節度使董璋謀叛結連西川孟



知祥甲申以鎮州節度使范延光爲檢校太傅守刑部尚書充樞密使利州閬州進納東川檄書言將兵擊利聞責以間諜朝廷爲名乙酉以左驍衛上將軍趙在禮爲同州節度使兼四面行營馬步軍都指揮使樞密院直學士守工部侍郎閻至樞密院直學士守尚書右丞史圭並轉戶部侍郎依前充職以翰林學士守戶部侍郎李懌爲尚書右丞以翰林學士戶部侍郎劉昫爲兵部侍郎以翰林學士中書舍人竇夢徵爲工部侍郎依前充職以中書舍人劉贊爲御史中丞以御史中丞許光義爲兵部侍郎以兵部侍郎姚顛爲吏部侍郎丙戌詔東川節度使董璋可削奪在身官爵仍徵兵進討丁亥以西川節度使孟知祥兼西南面供饋使天雄軍節度使石敬瑭兼東川行營都招討使以遂州節度使夏魯奇兼東川行營招討副使庚寅以右衛上將軍王思同爲京兆尹充

西京留守兼西南行營馬步都虞候冬十月壬辰以太子少傅李琪卒廢朝癸巳以鄜州節度使米君立卒廢朝詔凡賻贈布帛言段不言端四段者二丈也宜令三司依此給付甲午正衙命使冊興平公主于宋州節度使駙馬都尉趙延壽之私第己亥以左驍衛上將軍李從璋爲陝州節度使陝州節度使劉彥琮移鎮邠州尚書博士田敏請依舊典藏冰頒冰以銷陰陽愆伏之沴詔從之

五代會要載原勅云藏冰之制載在前經獻廟之儀廢于近代既朝臣之特舉案典禮以宜行田敏所奏祭司寒獻羔事宜依其桃弧棘矢事久不行理難備創其諸侯亦宜準往制藏冰

國史不詳詳臨國州通鑑  
任九月唐昭宗易史作十月乙  
丑詔易夫以奉問之日為據也

乙巳供奉官張仁暉自利州迴奏董璋攻陷閬州節度使李仁矩舉家遇害丁未宮苑使董光業并妻子並斬于都市璋之子也辛亥以武安軍節度副使洪鄂道行營副都統檢校太尉馬希聲爲武安軍節度使加兼侍中時湖南馬殷奏久病不任軍政乞以男希聲爲帥故有是命中書奏吏部流內銓諸色選人所試判兩節



度欲委定其等第文優者超一資其次者次資又次者以同類道  
理全疎者于同類中少人戶處注擬從之十一月庚申朔帝御文  
明殿冊皇子秦王仗衛樂懸如儀甲子正衙命使冊皇子宋王于  
鎮州是日幸龍門翼日馮道奏曰陛下宮中無事遊幸近郊則可  
矣若涉歷山險萬一馬足蹉跌則貽臣下之憂臣聞千金之子坐  
不垂堂百金之子立不倚衡況貴為天子豈能自輕哉帝斂容謝  
之退令小黃門至中書問道垂堂倚衡之義道因注解以聞帝深  
納之己巳故太子少保致仕封舜卿贈太子少傅庚午應州節度  
使張敬達移雲州以捧聖都指揮使守恩州刺史沙彥詢為應州  
節度使以潁州團練使高行周為安北都護充振武節度使壬申  
黔南節度使楊漢章弃城奔忠州為董璋所攻也乙亥制西川節  
度使孟知祥削奪官爵以其同董璋叛也丙子以前同州節度使

劍州下 聖道能考果引實錄云  
軍前奏今月十三日王宏執馮輝  
自利州入山路出劍門外州下  
陣把周兵士傷三千人獲柳  
齋走退大軍遂攻入劍門次  
表云七日破劍州破賊千餘人  
獲指揮劉太聖遂攻劍門以復  
劍州元及珠口薛走統歸于十三日  
疑有奸謀  
堅石 舊作何保誠今改正  
托及下 舊作突欲今改正

羅周敬為左監門上將軍丁丑故兵部侍郎許光義加贈禮部尚  
書辛巳西面軍前奏今月十三日階州刺史王宏贊瀘州刺史馮  
暉自利州取山路出劍門關外倒下殺敗董璋守關兵士三千餘  
人收復劍州甲申日南至帝御文明殿受朝賀丙戌以給事中鄭  
韜光為左散騎常侍青州奏得登州狀契丹索巴堅男東丹王托  
雲越海來歸國契丹國志時東丹王失職怨望因率其部四十餘人越海歸唐十二月乙未荆南奏湖南節  
度使楚國王馬殷薨廢朝三日庚子以前襄州節度使安元信為  
宋州節度使辛丑幸苑中丁未以二王後祕書丞龔儻國公楊仁  
矩卒輟朝贈工部郎中庚戌湖南節度使馬希聲起復加兼中書  
令壬子以樞密院直學士戶部侍郎閻至為澤州刺史樞密院直  
學士戶部侍郎史圭為貝州刺史甲寅遣樞密使安重誨赴西面  
軍前時帝以蜀路險阻進兵艱難潼關已西物價甚賤百姓輓運

抄本九  
抄本六



至利州率一斛不得一斛謂侍臣曰關西勞擾未有成功誰能辦  
吾事者朕須自行安重誨曰此臣之責也臣請行帝許之言訖而  
辭翼日遂行甲寅故西川兵馬都監泗州防禦使李巖贈太傅丙  
辰車駕敗于西山臘也丁巳回鶻遣使來朝貢戊午故荆南節度  
使檢校太尉兼尚書令南平王高季興贈太尉

宋史職官志三司使在

舊五代史卷四十一

舊五代史卷四十一攷證

唐明宗紀七癸丑索自通藥彥稠等奏收復河中 案通鑑作辛

亥索自通拔河中斬楊彥溫癸丑傳首來獻歐陽史亦作辛亥

自通執彥溫殺之較是書為詳審

張延朗可充三司使班在宣徽使下 案宋史職官志三司使在

宣徽使後蓋仍後唐之制

淮南海州都指揮使王傳拯 王傳拯歐陽史作傳極攷是書列

傳及通鑑並作傳拯疑歐陽史傳刻之訛

乙巳供奉官張仁暉自利州迴奏董璋攻陷閬州 案董璋陷閬

州通鑑作九月庚辰歐陽史作十月乙巳蓋以奏聞之日為據

也

辛巳西面軍前奏今月十三日階州刺史王宏贊瀘州刺史馮暉



自利州取山路出劍門關外倒下殺敗董璋守關兵士三千人  
收復劍州 案通鑑攷異引唐實錄作今月十三日大軍進攻  
入劍門次十七日收下劍州是書統繫于十三日疑有舛誤  
安巴堅舊作阿保機今改 托雲舊作突欲今改

舊五代史卷四十一攷證



